

# تحت سقف واحد

رواية بالعلمية المغربية



نشر إلكتروني

دينا عواد

The Cover Design By: [M.A. Moril7y](#)

**تحت سقف واحد**

# تحت سقف واحد

2012

دينا عماد  
رواية بالعامية المصرية

فكرة نشر الكتاب إلكترونياً:  
أحمد محمود

الغلاف والإخراج الفني:

محمد عبد القوي مصيلحي

mamosil7y@gmail.com

حقوق الطبع والنشر محفوظة للمؤلفة ولا يجوز  
إعادة طبع هذا الكتاب أو جزء منه، أو الاقتباس  
دون ذكر المصدر، إلا بموافقة خطية، ومن يخالف  
هذا يعرض نفسه للمساءلة القانونية.

# تحت سقف واحد

رواية بالعامية المصرية

دينا عماد

أهدى  
عبدالله بن  
عبدالله بن  
عبدالله بن

أهدي كتابي الأول  
لكل قارئ من قرائي اهتم بمتابعتي  
وقال لي رأيه بصراحة وموضوعية  
وشجعني على الاستمرار

وأهديه أيضا لمن يقرأ لي للمرة الأولى

إهدائي

لك

لك

دينا عماد

## . 1 .

طول الطريق وشيرين راجعة من شغلها وهى بتفكر ازاى هتعلن عن قرارها اللي طول الاسبوع بتفكر فيه بس مكنش عندها وقت تاخذ القرار لانها متأكدة ان القرار هيكون وراه مداولات ومناقشات وضغوطات من كل اللي حواليتها فضلت ان يوم الخميس هتعلن قرارها علشان يبقى عندها الجمعة تنهى فيه كل مايتعلق بالموضوع اللي انتهى بالنسبة لها.

لما وصلت بيتها كان كل شئ كالمعتاد مامتها محضرة السفارة فى نفس ميعاد كل يوم ومروة اختها بتكون نائمة وبتصحى لما شيرين بتوصل الساعة ٦ علشان يتغدوا كلهم مع بعض... رغم انها كتير اتحايلت عليهم يتغدوا هما لما مروة ترجع من شغلها ومش لازم يستنوها بس كانوا بيصمموا انهم لازم يتجمعوا مع بعض وقت الغدا وهما بينتها من اكلهم..

مروة"تتخيلي ياماما ان فاضل لنا على اللمة الحلوة دى شهر واحد ٣٠ يوم وبعد كده نبقى انا وانتى بس"

الام"ربنا يهنيها ويسعدها وعقبالك انتى كمان يامروة يابنتى"  
حاولت شيرين تفجر القنبلة بس محبتش انها تضايق مامتها  
واختها الوحيدة وهما لسه مخلصوش غداهم فقررت انها تتكلم بس  
بعد الغدا

وهما قاعدين بيشرىوا الشاى وبيتفرجوا على التليفزيون جت  
شيرين وقعدت معاهم وقفلت التليفزيون فجأة

"انا عايزة اقولكم حاجة مهمة"

انتبهت الام ومروة بقلق وترقب وسكوت مستنيينها تكمل

"انا قررت افسخ خطوبتى على حسام"

صرخت الام وخبطت بايدها على صدرها وواندهشت مروة

"سيبونى اكمل كلامى"

الام"تكلمى ايه... انتى ازاي فجأة كده بعد ماكل حاجة

تقريبا هتخلص وبعدين ازاي ترفضى واحد زى حسام بالسهولة دى"

مروة"ياماما استنى.. ليه ياشيرين ماله حسام"

الام"واضح انها نسيت حاجات كتير اوى بتخليها تنبطر"

شيرين"نسيت ايه ياماما"

الام"نسيتى ان عندك ٣٢ سنة ومش سهل اذك تسببى واحد

كويس زى حسام... نسيتى ان ال٧ سنين اللى فاتوا كان كل اللى

بيجيلك مش مناسب... نسيتى ان كلها كام سنة وفرصتك فى

الخلقة تقل وانا مش عايشالكم انا نفسى اطمن على كل واحدة فيكوا  
فى بيت جوزها ومعاها عيالها”

شيرين”ياماما مش الراجل والعيال هما كل حاجة”  
الام” اومال ايه؟؟ شغلك اللى عايشة علشانه انتى بتروحي من  
٩ الصبح لحد ٦ المغرب ومفيش راجل هيرضى بكده وحسام وافق  
وقال وماله انا عايزها بكل ظروفها”

شيرين”يعنى ياماما ده شغل حد يفرط فيه؟”  
الام” انا عارفة ان مرتبك بالالاف وعارفة ان منصبك كبير بس  
انتى لو تعبتى ومقدرتيش تشتغلى هيرموكى ويشوفوا غيرك انما  
جوزك وعيالك مش هيرموكى”

شيرين”ياماما الشغل مالوش علاقة اصلا”  
الام”طيب فهمينى ايه اللى حصل فجأة”

شيرين”انا طول الكام شهر اللى فاتوا دول ويقول هحبه ولما  
محسيتش الحب قولت هيجى بالعشرة طول ماهو كويس معايا”  
مروة”بس فعلا حسام كويس معاكى ومستواه الاجتماعى  
والتعليمى وكل حاجة مناسب ليكى ومش مهم الحب بتاع الروايات  
علشان الجوازة تتم... ده غير ذوقه ووسامته يعنى زوج يشرف من  
جميع الجهات”



شيرين"بس فيه حاجة مش قادرة اتكيف معاها"

الام ومروة بقلق"ايه هي دي"

شيرين"كذاب وقبل ماتدافعوا عنه وتقولوا انه مكذبش علينا  
فى حاجة... انا شفته بيكذب فى حاجات كتير هي اه حاجات  
صغيرة بس كتير اوى اوى وده خلانى مبقاش عندى ثقة فيه ومش  
بصدقه فى حاجة خالص وانا مش قادرة اكمل معاها"

الام"وقلتيله؟؟ ولا لسه؟؟"

شيرين"لسه هو عموما جاي على الساعة ٩ وانا حضرت  
الشبكة وكل الهدايا اللي جابها والموضوع بالنسبة لى منتهى"  
الام"خلاص انتى حرة بس خايفة انك تندمى عليه وتقولى  
ياربنتى"

مروة"طيب ماتستنى كام يوم تفكرى تانى؟؟"

شيرين"انا بفكر بقالى فترة وخلص قررت"

قامت الام وعلى وشها كل علامات عدم الرضا على قرار  
شيرين وهى بتمتم فى سرها"ياعالم الفرصة اللي ضيعتها دي جاية  
تانى ولا لأ"

## . 2 .

قامت شيرين وحضرت علبة الشبكة والخاتم اللى كان  
جابهولها فى عيد ميلادها وكانت منتظرة حسام علشان تنهى  
الموضوع كله

وفعلا فى ميعاده بعد ٩ بشوية صغيرين وصل حسام وكالعادة  
كل ماييجى كان ييجى معاه حاجة مرة علبة شيكولاتة مرة تورتاية  
او جاتوه ومهما مامتها قالت له ان مش لازم كل مرة ييجى شاييل  
كان يقولها دى حاجة بسيطة ومش قد المقام ... هى متنكرش انه  
ذوق جدا وكريم لابعده الحدود بس مش قادرة تتكيف مع كذبه  
سمعت الترحيب بتاع كل مرة من مامتها وبعدين خرجت  
ومعاها الحاجة وانسحبوا مامتها واختها علشان ميحضروش الموقف  
البايخ ده

”اهلا يا حسام اتفضل“

”ازيك يا شيرى ... وحشتينى“

واول ما شاف العلبتين فى ايدها قال بدهشة واستغراب

”ايه ده؟؟؟“

”دى الشبكة والخاتم زى مانت شاييف“

”ايوه شايف بس مش فاهم“

”بص يا حسام انا عايزة اقولك كلمتين... انا اسفة وبعتر لك

انى مش هقدر اكمل حياتي معاك“

”انتى بتقولى ايه ؟؟؟ احنا حددنا معاد الفرح وحجزنا القاعة

وحجزنا العفش وكل حاجة تقريبا خلصت... ده انا كنت هبدأ اعزم

الناس... تقوليلى بعتر“

”معلش انا بجد اسفة وبالنسبة للفرح عادى ممكن تلغى

الحجز او سيبنى انا اتصرف وارجعلك العربون اللي دفعته وبالنسبة

للعفش برضه مغيش مشكلة ممكن تقول لصاحب المعرض ان مغيش

نصيب واكيد يعنى حاجة زى كده عادية وبتحصل“

”طيب سيبك من كل الحاجات دى مش مهم... يعنى ايه مش

هتقدرى تكلمى“

”يعنى مش هقدر... احنا اول ما اتقدمتلى كنا واضحين جدا

مع بعض واتفقنا ان جوازنا هيكون عن طريق عقولنا... دلوقتي عقلى

بيقوللى اننا مش هنرتاح مع بعض“

”طيب وقلبك؟؟؟ انا حبيبتك ياشيرين“

”وانا كنت ابتديت احبك بس اكتشفت فيك حاجات بجد

مش هقدر اتكيف معاها“

”ايه هي الحاجات دى“

”يا حسام انت بتكذب فى اليوم ١٠٠٠ مرة والغرابة انك مش حاسس ان ده كذب... يعنى لما بنكون مع بعض كل ما يجيلك تليفون تقول انا فى الشغل انا فى اسكندرية انا مش عارفة فين... ولما بتشتري حاجة واسألك عن سعرها بتقول حاجة واكتشف بالصدفة حاجة تانية خالص... حتى قاعة الفرح اللي اتفقنا عليها قتلتي محجوزة ومش فاضية وبالصدفة امبارح صاحبتى بتعزمنى على فرح اختها ولما طلع نفس اليوم اللي حددناه للفرح والقاعة فبقولها يعنى انتوا اللي حاجزين من قبلنا واخذتوا القاعة مننا لقيتها بتقولى بالعكس ده اليوم ده وكام يوم تانيين كانوا فاضيين ولسه حاجزين من ٤ ايام بس... انا مش عارفة كل الكذب ده ليه؟“

”انا اسف يا حبيبتي واوعدك ابقى اخذ بالى ومكدبش عليكى

تانى“

”انا مش بتكلم عن نفسى بس انت بتكذب على كل الناس“

”وانتى شايقة ان ده سبب يخلينا نسيب بعض... دى حاجة

بسيطة“

”لو انت شايقة حاجة بسيطة فانا شايقاها كبيرة“

”يعنى مفيش فايده ومصمة“

”ايوه واتمنى لك السعادة وانت اكيد هتلاقى واحدة احسن

منى وترتاحوا مع بعض“

ومدت شيرين ايديها بالعلبتين فاخذهم حسام ومشى ورزق  
الباب وراه... جت مامتها على صوت رزعة الباب  
"خلاص برضه عملتى اللي فى دماغك"  
"الحمدلله... مرناaaaaaaaaا احة اوى دلوقتى ياماما"  
"انتى غريبة اللى تسبب خطيبها تقعد زعلانة ومتضايقه مش  
زى مانا شايفة"  
"وانتى هتخلينى زعلانة ليه بس ياماما... انا مبسوطه  
جدا... فين مروة... يا مروة يا مروووووة"  
جت مروة تجرى  
"نعم... ايه حسام مشى؟؟؟ خلاص كده"  
شيرين "سيبونا بقى من حسام خلاص صفحة واتقفلت  
خالص... عايزة نخرج بكرة ونتفسح ونقضى يوم حلو... تحبوا  
تروحوا فين؟"  
الام اكنفت بممصمة شفايفها وهى بتقول  
"عشنا وشغنا"  
والبننتين عملوا نفسهم مش سامعينها وكملوا كلامهم  
مروة "تعالى نروح دريم بارك"  
شيرين "اتفقنا انا قايمه انام ونبقى ننزل بكرة قبل الصلاة  
علشان الزحمة... تصبحوا على خير"

وقامت شیرین ودخلت تنام وهي حاسة ان فيه حمل

تقييييييييل وانزاح من على قلبها

### . 3 .

كانت شيرين مستمتعة جدا باليوم ده... هي بتخرج كتير  
بحكم شغلها فى العلاقات العامة وحتى وهى مخطوبة لحسام كانت  
بتخرج وتتفسح معاه بس مكنتش بتبقى مرتاحة كده... مروة كمان  
مبسوطة... مامتها مش عاجبها اللي شيرين فيه... وبتستغرب ...  
هو فيه كده... واحدة فسخت خطوبتها امبارح والنهاردة بتتفسح  
وتلعب وسعيدة كده؟؟؟ غريبة!!!!!!

بعد مارجعت البيت ولسه هتنام علشان تستعد لشغل تانى يوم  
لقت حسام بيتصل بيها اتفاجئت... ترد... تقفل التليفون؟؟؟

فكرت وحسنت قرارها فى ثوانى قليلة

"الو... ايوه يا حسام"

"ازيك يا شيرى"

"انا كويسة جدا الحمدلله...خير فيه حاجة"

"لا انا كنت بكلمك اقولك فكرى تانى فى موضوع امبارح...

انا ممكن اتغ..."

قاطعته وهو بيتكلم

”لو سمحت يا حسام موضوعنا انتهى وبلاش تتصل بيه تانى  
علشان مفيش مجال لرجوعى فى قرارى.. واى كلام بينا مالوش  
لازمة“

”ياشيرين انا بحبك“

”اسفة يا حسام الموضوع انتهى...تصبح على خير“  
قللت التليفون وهى مرتاحة اكثر انها كانت بالقوة دى وانها  
حسنت الكلام معاه وقالت حتى لو كلمها تانى هتقول نفس الكلام  
تانى يوم راحت شغلها وهى مقبلة على الحياة...وهى اصلا  
من حبها فى شغلها دايمًا بتكون مبسطة فيه حتى لو حاجة  
مضايقاها... فالنهاردة بالذات حاسة ان كل حاجة حلوة اوى ...  
وخلال اليوم استدعاها رئيس الفرع لمكتبه...وده عادى وبيحصل  
كتير

”مساء الخير يامستر على“

”مساء النور يا شيرين... اتفضللى اقعدى علشان عايزك“

”خير“

”اولا مبروك على الجواز..انا عرفت انك هتتجوزى الشهر

”الجاي“

معرفتش ترد وهترد تقول ايه هو اكيد مخدش باله انها مش  
لابسة الدبلة فاكثفت بابتسامة خفيفة وهزة راس وكمل كلامه



“انا عندى ليكى عرض جامد وفرصة صعب تيجى لحد”

“ياترى ايه؟؟؟”

“الشركة فتحت فرع جديد فى المغرب وبتجمع الكفاءات من كل الفروع ده غير الناس المغاربة اللي هيشغلوا فى الفرع وانا رشحتك لمنصب مدير العلاقات العامة وطبعا المرتب اضعاف مرتبك والسكن هناك تبع الشركة فيه عمارة لعائلات العاملين واكيد هيكون لك شقة فيها لو قبلتى... بس ياترى جوزك هيقدر يسافر معاكى؟؟؟”

“مش عارفة حتى لو مش هيقدر اسافر انا”

“لا للاسف مينفعش... العمارة هناك كلها اسر الموظفين وكان مترشح للمنصب ده مدير العلاقات العامة فى الكويت بس الفرع الرئيسى رفض لانه مش متجوز”

“يعنى لازم اكون متجوزة واسافر انا وجوزى”

“ايوه وعلى فكرة الشركة هناك محتاجة شغل كتير يعنى ايا كان شغل جوزك لو يحب يشتغل معانا ممكن نشوف حاجة تناسبه”

“مش عارفة ارد على حضرتك بسرعة كده”

”بصى هو الافتتاح كمان اسبوعين وانا ممكن اكلهم يستنوكى  
هناك اسبوعين كمان بعد جوازك يعنى تعيشى اسبوعين غسل قبل  
الشغل هههههه بس طبعا انا عايز ردك بسرعة”  
”امتى يعنى ”

”يعنى بالكثير يوم الخميس تكونى رديتى عليه علشان لو  
موافقة نبدأ فى الاجراءات ولو مش موافقة نلحق نشوف حد تانى  
مناسب ”

”ان شاءالله يافندم...بعد اذنك”

خرجت شيرين من المكتب وهى تقريبا مش شايفة قدامها...  
فرصة زى دى استحالة تسببها... بس الشرط ده هتتنفذه  
ازاى؟؟؟؟؟؟

## . 4 .

فضلت شيرين كل اللي شاغل تفكيرها الفرصة اللي جيايها  
والشرط اللي قصادها... مروة ومامتها لاحظوا عليها انها مش على  
طبيعتها بس تخيلوا انها زعلانة علشان الخطوبة اللي اتفسخت...  
عدى السبت والاحد الاثنين وهى مش قادرة تحسم قرارها وحست  
الايام بتجرى وهى مش عارفة تعمل ايه؟؟

دخلت لها مروة وسألتها عن سبب سرحانها فحككت لها

الحكاية

"بس ياشيرين الحكاية دى محلولة"

لمعت عيون مروة واتعدلت وبصت لاختها

"محلولة ازاي"

"حسام موجود وكل حاجة تتم فى ميعادها"

"لالالا مش ممكن هروح اقله نتجوز؟؟"

"خلاص اقله انا انك كنتى مضغوطة من الشغل ولا زعلانة"

علشان حكاية القاعة... اى كلام وهو ماهيصدق وتبقى انتى

مقلتيلوش على رجوعك له تانى"

"الحكاية مش مين يقوله... انا مقدرش اتحمل انى اعيش

معاه"

”وهتعملى ايه؟؟؟“

”انا هستنى لحد يوم الخميس يمكن الاقى حل قبلها... وان  
ملقيتش خلاص يبقى ماليش نصيب واعتذر عن الفرصة اللي مش  
هتتعوض دى“

”ربنا يحلها من عنده“

قامت مروة وحاولت شيرين تنام بس معرفتش من التفكير ولما  
بدأت تنام لقيت مروة داخله اوضتها تجرى وتصحيحها وتفتح  
التليفزيون

”شيرين قومي... الحل اهو هنا“

قامت شيرين بسرعة بس بتبص لقيت مروة بتشاور على

التليفزيون

”الحل فين؟؟؟ فى التليفزيون“

”ايوه بصى ده فيلم قص ولزق وفيها البطلة كانت عايزة تسافر  
بشروط تتجوز شافت البطل اتجوزته“

”انا عارفة الفيلم... بس انتى اتجننتى هتجوز واحد معروفش

ازاى... كان حسام ارحم... احنا هنمثل دى حياتى مش فيلم“

”خلاص ياستى انا غلطانة لك... تصبى على خير“

”وانتى من اهله“

وكان النوم غلبها وهى بتفكر فى كلام مروة بس لقيته مش  
واقعى خالص وكلام افلام  
قامت شيرين متاخر عن ميعادها على غير العادة فلبست  
ونزلت بسرعة علشان متتاخرش على الشغل وعلشان اليوم باين من  
اوله العربية مدارتش معاها ولانها متاخرة سابتها وركبت تاكسى  
فى الشغل استدعاها رئيس الفرع وعرفت انه هيسألها عن  
قرارها

”ايه ياشيرين اخدتى القرار ولا لسه“

”احنا النهاردة الثلاثاء يامستر على مش اتفقنا على الخميس

تاخذ الرد النهائى“

”هو هيفرق معاكى اليومين دول“

”اه معلىش هيفرق معايا يوم الخميس هيكون عندك الرد“

وبعد الشغل افتكرت شيرين العربية اللي واقفة من الصبح  
فاتصلت بالميكانيكى وقالها هيبعت واحد ياخذ العربية بس تستناه  
فى مكان العربية وفعلا بعت واحد اخذ العربية واتصل بيها  
الميكانيكى قالها تيجى تانى يوم بعد شغلها تاخذ العربية تكون  
جاهزة

ما زالت بتفكر فى السفر اللى اخذ كل تفكيرها وكل ده خايقة  
تقول لمامتها علشان هتضغط عليها ترجع لحسام وده اللى رفضاه  
تماما

راحت شيرين تاخذ العربية ودفعت للميكانيكى ال ٤٠٠ جنيه  
اللى طلبهم ومشيت وهى فى الطريق كانت برضه بتفكر وحسمت  
قرارها ان خلاص بكرة الخميس ومعندهاش حل تانى وهترفض  
السفر... رن الموبايل

”الو...ايوه مين معايا“

”انا اللى جيت اخدت العربية من حضرتك امبارح ممكن  
ترجعى بس اقابلك على اول الشارع اللى فيه الورشة علشان حاجة  
ضرورى“

استغربت من اصراره ورجعت تشوف عايزها ليه

”نعم ... انت اتصلت بيه ليه؟؟“

”بصى حضرتك الميكانيكى ده حرامى انا بقالى اسبوع بشتغل  
معاه ومشفتش منه حاجة بس النهاردة لقيته بيحاسبك على  
٤٠٠جنيه وهى حاجة متسناهلش ١٠٠ جنيه... وبعد مامشيتى  
وسألته ليه كده قالى ياعم دى واحدة ست لاهى فاهمة حاجة فى  
العربية ولا عمرى شفت لها راجل جه معاها وشكلها مستريحة  
واللى بطلبه باخده... انا اتضايقت من كلامه على حضرتك

واتخانقت معاه وطردنى... فلو عايضة ارجع معاكى تاخذى فرق  
فلوسك تحت امرك ولو عايضة تروحي لميكانيكى تانى واشرحله هو  
عمل ايه فى العربية ويقدرلك سعر التصليحات انا معاكى  
"انا مش مصدقة اللى بسمعه... طيب وانت ليه عملت كده  
وسيبيت شغلك علشانى"

"مش علشان حضرتك ده علشان ربنا ميرضاش بالغش اللى  
حصل وطريقة كلامة اللى فيها افترا معجبتنيش... انا عارف ان  
ربنا هيعوض عليه بشغل تانى علشان انا وقفت للحق"  
"انت معاك شهادة ممكن اشوفك شغل"  
"ايوه معايا دبلوم صنايع وميكانيكى شاطر لو تتوسطيلى عند  
حد يكون كتر خيرك"

"انت ممكن تسافر بره"

"ياريت بس ميطلعش نصب ولا هجرة غير شرعية اللى  
بيموتوا فى البحر"  
"لا هو فيه شغل ومضمون وكل حاجة بس فيه شرط"  
"شرط ايه؟؟"  
"تتجوزنى؟؟"

”لا يا استاذة حضرتك فهمتيني غلط... انا وقفت ضد اللي  
مشغلنى علشان حقك ومهمنيش ... تفتكرى مهما كنت محتاج هبيع  
نفسى بالفلوس... انا آسف ”



## . 5 .

وقفت شيرين مكانها وهي مش قادرة تتحرك بعد ماسابها ومشى.. ايه ده هي حتى متعرفش اسمه ازاي تقول حاجة زى كده.. وجابت الجرأة دى منين... حسست ان الناس كلها شايفة احراجها ركبت عربيتها وجريت بسرعة علشان توصل البيت وتستخبى فى اوضتها.

كان ماليها شعور بالندم على تسرعها ومقدرتش تحكى حاجة لمروة لانها اكيد هتقول عليها مجنونة... وقررت انها هتعتذر عن السفر مهما حصل ومش هتعرض نفسها لموقف شبيهه بكده تانى ابدأاا.

### ياسر

الميكانيكى الشاب... مشى وهو مش مصدق اللى سمعه وتقريبا كان بيكلم نفسه وهو ماشى... ايه الموقف الغريب ده... ايه الست دى وازاي تساومنى على وظيفة مقابل جواز... اكيد وراها مصيبة عايزة تلزقها فى اى حد... لولا انها ست انا كنت... ايه.. مش عارف... هو فيه كده فى الدنيا... انا مش مصدق... مش مصدق وصل للحارة الشعبية البسيطة اللى عايش فيها ولاحظ عليه ابراهيم صاحبه شروده وهمماته وهو ماشى... وقعدوا مع بعض

على القهوة ولما ابراهيم سأله عن حاله...حكى كل اللي حصل وهو  
ما زال مش مصدق  
"ياعم ياسر مالك مكبر الموضوع كده ... انا قلت في حاجة  
كبيرة"

"ودى مش حاجة كبيرة... الست زى ماتكون عايزة تستغلنى  
وانا مش مطمئن ولا مرتاح ولا عارف هى عايزة تعمل كده ليه"  
"هى ست كبيرة ولا ايه؟؟"

"معرفش سنها بالظبط ومفيش كلام كتير دار بينا... هى اول  
مافاجئتني بكلامها سيبتها ومشيت"

"يعنى انت عاجبك حالك ده وحال ابوك وامك واخواتك ..  
اتجوزها وسافر وارجع بقرشين تبدأ بيهم حياتك... انت عندك ٢٨  
سنة ويدوب بتساعد فى مصاريف اخواتك ...تفتكر عايز كام سنة  
علشان تعرف تتجوز"

"لالالا الله الغنى على دى جوازة ... انا طالع البيت سلام"  
"سلام بس فكر تانى وشوف حال اهلك"

دخل ياسر البيت وكانت كل حاجة كالمعتاد... ابوه قاعد  
بيسمع الراديو وامه قاعدة فى الحمام قدام تل غسيل واخته ياسمين  
الاصغر منه قاعدة تذاكر لمحمد ومصطفى ...ولما شافته قامت  
حضرت له الغدا وقالت له

”بعد ماتتغدا يا ياسر عايزاك فى كلمتين“

”خير عايزانى فى ايه قولى“

”حسن قالى انه جاى لابويا النهاردة“

فقالها وهو بيضحك

”ومن امتى خطيبك بياخد معاد وهو جاى... ماهو عندنا على

طول“

”لا ياباسر ده جاى لابويا علشان ياخذ منه كلمة... ونحدد

معاد الجواز“

”مبروك ياستى ربنا يتمم بخير“

”طيب والنبي كلمتين لابوك علشان كل مايتيجى سيرة تحديد

معاد الجواز بيقلب ومبيديلوش كلمة“

”اطمنى هكلمه ونفرح بيكوا قريب“

بعد ماياسر خلص اكل لباياه وقعد جنبه

”ازيك يااحاج... عايزين نفرح بالبت ياسمين بقى كفاية ٤

سنين خطوبة“

”نفسى افرح بيها يابنى واطمن عليها انا مش شايل همكوا

انتوا صبيان انا نفسى اطمن ع البت الوحيدة اللى عندى“

”طيب مااحنا عارفين حسن وهو راجل وجدع وبيحبها“

”عارف يابنى بس اعمل ايه“

ومسح ابو ياسر دمعتين نزلوا غصب عنه واتفاجئ ياسر

”مالك يا حاج انت مش عايز تجوزها؟؟“

”انا مش عارف اجوزها... لولا ان امك بطلة وعارفة تمشي

البيت بال٤٥٠ جنيه المعاش اللي باخده كنا اتفضحنا يا بنى

وجوعنا“

”يعنى ايه“

”يعنى حتى لو اختك قعدت ١٠ سنين كمان هعمل ايه؟“

ماباليد حيلة“

قام ياسر وهو مش عارف يرد على ابوه ودخل نام

صحى من النوم على صوت ياسمين بتعيط ولما سألها عن

السبب

”حسن جه وكلم بابا علشان يحدد معاه معاد ونفس رد كل

مرة استنى شوية... وقريب هقولك وكلام من ده... وبعدها حسن

اتخانق معايا وسابنى ونزل... انا عارفة انه زهق ومعاه حق“

وقعدت تكمل عياط... اخدها فى حضنه وطمنها

”متقلقيش كام يوم وانا هحدد معاد مع حسن... متزعليش

بقى“

نطت الفرحة فى عينين ياسمين المليانة بالدموع ... بص ياسر

فى ساعته كانت ١ بالليل

مسك تليفونه واتصل بشيرين

”الو... استاذة شيرين...انا ياسر الميكانيكى... انا اسف على

اللى حصل النهاردة... انا تحت امرك وموافق على كل اللى انتى

عايزاه“

## . 6 .

اتفاجأت شيرين بالمكالمة غير المتوقعة دى

”بس انا خلاص صرفت نظر عن السفر... انا اسفة معلىش“

”ارجوكى انا تحت امرك فى اى شروط بس انا محتاج اسافر

ويكون بعقد مضمون... ارجوكى انا محتاج الشغل جدااا“

”طيب ادينى فرصة لبكرة وارد عليك لو لقيت لك شغل“

قامت شيرين وقعدت بعد المكالمة تفكر وتقول ياترى هو بيقول

عليها ايه دلوقتى وايه اللى غير رأيه بالسرعة دى... هى بتفكر ليه

هى خلاص قررت انها هتعتذر عن السفر

دخلت لها مروة

”ايه ده انتى صاحبة... انا سمعت موبايلك بيرن دلوقتى

واستغربت“

”ولو عرفتى اللى حصل هتستغربى اكثر“

وحكت شيرين لمروة كل اللى حصل

”اممم انا صاحبة الفكرة اه بس مكنتش متخيلة انك

هتاخديها جد انا كنت بس عايزة ابين لك ان حسام فرصة

متضيعيهاش ... بس ميكانيكى ياشيرين... وماما استحالة توافق

على حاجة زى كده... بلاش السفرية دى... مين عارف اخلاقه ايه  
ولا يعمل فيكى ايه هناك... خليكى معنا احسن"

"اه معاكى حق... لو لقيت له شغلانة اقله وخلاص"

راحت شيرين الشغل تانى يوم وهى مقررة الاعتذار عن

الوظيفة ولما دخلت لرئيس الفرع

"ها ياشيرين قلتي ايه؟؟"

"انا اسفة يامستر على مش هقدر"

"خسارة ده انتى كنتى هتمسكى العلاقات العامة لل٣ الفروع

اللى فى المغرب الفرصة دى مش بتيجى لاي حد"

وقت الكلام مايبيجى عند شغلها بتحس انها مغيبة وعايضة

تحقق اكبر نجاح فيه ولقت نفسها بترد بسرعة

"انا موافقة... بس عايضة شغل لجوزى وتحديد معاد السفر"

"معاد السفر هيكون الشهر الجاى يعنى قدامك حوالى ٤٠ يوم

من النهاردة بس ياريت تسرعى فى كتب الكتاب والاوراق بتاعتك

وبتاعة جوزك روى بيها لاحمد فتحى فى الدور التانى وهو

هيخلص الاجراءات ويقولك على الشغل المناسب وكل التفاصيل"

"اوك ميرسى يامستر على... بعد اذنك"

قامت شيرين وهى فرحانة جدا بفرصة الشغل وفى نفس

الوقت خايقة من الجوازة العجيبة والشخص الغريب ده... نزلت

الدور التانى لاحمد المسئول عن السفر علشان تعرف ايه الشغل المناسب وعرفت منه ان الوظيفة المناسبة لياسر وعلشانها هتكون وظيفة ادارية ومرتبته مايعادل ٧ الاف جنيه مصرى... طبعا ده اقل من مرتبها بكتير... بس حسنت انه اكيد محتاج اى شغل.. فاتصلت بيه وحددت معاه معاد بعد الشغل علشان يتفقوا على التفاصيل

وفى المعاد كان كل واحد منهم متحفظ فى كلامه مع التانى

"انا شفت لك شغل فى الشركة ومرتبك هيكون حوالى ٧ الاف

...يناسبك؟؟؟"

رد بفرحة "طبعا يناسبنى جدا متشكر اوى... وبالنسبة للاقامة

هعيش فىين"

"الشركة ليها عمارة ولينا فيها شقة باعتبارنا زوجين...

وعايزة احط معاك حدود الجواز ده هيكون ازاى... احنا هنكتب

الكتاب بس علشان الشغل وعلشان مبيقاش حرام عيشتنا فى بيت

واحد... انما مفيش اى حقوق ولا واجبات مترتبة على الجواز ده...

لا انت ملزم بمصاريف تصرفها ولا انا ملزمة بخدمة واكل وغسيل

... كل واحد جوه البيت هيعيش فى حاله... متفقين"

"تحت امرك بس انا كنت عايز اعرف حاجات عن حضرتك"

"حاجات ايه"





ياسر كان بيقول لنفسه...ست مفترية ومستقوية بفلوسها  
ومركزها... مستغلة...استغلت احتياجي للفلوس علشان تحقق  
مطامعها... مضطر اجاريها... هتعامل معاها ازاي دي...وهقدر  
استحمل غرورها؟؟؟

. 7 .

بل ماياسر يطلع البيت قابل صاحبه ابراهيم

”مالك ياياسر مهموم كده ليه؟؟“

”قرفان من نفسى“

”طيب اطلع استحمى هههههههه“

”ماشى ياعم سلام“

”استنى بس انا بهزر معاك متزعلش وفك كده واحكى مالك؟“

”انا وافقت على العرض اللي حكيت لك عليه... صعب عليه

حال ابويا واخواتى وخصوصا ياسمين“

”مش قلتك وافق“

”بس الست دى فظيعة اوى ومتعجرفة كده وعمالة تدينى فى

اوامر وانا مش بتاع كده وساكت علشان محتاج ومش عارف هفضل

متحمل لامتى“

”هى جوازة على طول يعنى“

”لا الحمدلله جوازة ع الورق واقصى حاجة ٣ سنين مدة العقد“

”مع انها غريبة بس اهو اى حاجة تجيب فلوس والسلام“

”ايوه معاك حق...ياللا انا طالع علشان افرح البت ياسمين

اللى مقهورة من امبارح“

"طيب سلام وابقى انزل اسهر معايا بالليل"

"ماشى اما اشوف...سلام"

طلع ياسر البيت وكان كل اللي فى البيت قاعدين بيتفرجوا

على التلفزيون... راح واقف قدام التلفزيون فجأة

"انا عندى ليكم خبر هيفرحكم"

ردوا كلهم "هااااا...خير"

"انا جالى عقد عمل فى المغرب وبمرتب كويس

الحمدلله...واول حاجة هجهز ياسمين باللى هى عايزاه "

قامت ياسمين على ياسر وحضنته وهى فرحانة وبتقوله

"ربنا يخليك يااحلى اخ"

والام الاب مازالوا متفاجئين وسأله باباه

"يعنى يابنى دى حاجة مضمونة "

"ايوه يابابا مضمونة ان شاءالله واحد صاحبى بيشتغل هناك

وجابلى عقد معاه فى نفس الشركة"

"ربنا يوفقك ان شاءالله"

\*\*\*

رجعت شيرين البيت وهى مازالت قلقانة من ياسر وخصوصا

ان كل اللي عرفته عنه بيوضح قد ايه مفيش بينهم تكافؤ... وكانت

كل حيرتها تقول لماتها ولا متقولهاش... هتقولها ايه؟؟؟ هتقول

رفضت جوازها من حسام ورايحة تتجوز واحد متعرفش عنه حاجة  
غير حاجات بسيطة والحاجات دى تقلق اصلا ولا تكافؤ اجتماعى  
ولا فكرى ولا حتى سنهم مناسب لبعض... يبقى متقولش لامتها...  
ازاى تتجوز وتسافر من غير ماتقول حاجة لامتها... تعمل ايه؟؟؟  
تاخذ رأى مروة يمكن تفيدها... اصلا مروة متعرفش التطورات  
الجديدة وانها اتفقت مع ياسر على الجواز... لازم تقول لامتها مش  
هتقدر تخبى عليها حاجة زى دى

قررت انها هتقول لامتها بس بطريقة تانية خالص

قعدت مع مامتها ومروة وقالت

"ماما انا عايزة اقولك حاجة هتفرحك"

"خير.. يابنتى"

"انا جايلى عريس"

الام "بجد والنبي ياترى مين وببشتغل ايه؟"

مروة "اوعى يكون..."

قاطعتها شيرين فجاة وغمزتها

"اه يامروة العريس اللي كنت قايلالك عليه من يومين"

سكتت مروة خالص لحد ماتفهم

الام "يعنى اختك تعرف وانا لا"

”بصى ياماما هو اسمه ياسر من اسكندرية وشافنى فى الشركة  
لانه بيتعامل معنا واعرّفه من فترة بس لما شاف انى فسخت  
الخطوبة اتقدملى وقال عايز بيحى يقابلك”  
”اهلا وسهلا بيه بس انتى تعرفيه كويس”  
”اه ياماما وعايضة اقولك حاجة كمان”  
”هاااا”

”انا جالى ترقية انى اسافر المغرب وهو هيسافر معايا... بعد  
موافقتك طبعا”

”وماله يابنتى بدل مع جوزك خلاص... الحمدلله انى هظمن  
عليكى... خليه بيحى اتعرف عليه ولو كويس نقرا الفاتحة”  
”حاضر ياماما هشوفه فاضى امتى واقولك .. بس عايزين  
نكتب الكتاب بسرعة علشان السفر”

”يا بنتى لو كويس يبقى ربنا يتمم بخير”  
قامت شيرين دخلت اوضتها ودخلت وراها مروة  
”ايه ياشيرين... انتى مش قلتى هترفضى السفر”  
”ايوه قلت بس مقدرتش... والولد شكله مالوش شخصية هقوله  
يمين يمين شمال شمال”

”وايه الفيلم اللى عملتيه على ماما ده”  
”مقدرتش اقولها الحقيقة لانها اكيد كانت هترفض”

”طیب وانتی مش کده تبقی بتکدبی وده اللی سیبیتی حسام

علشانه ”

وقفیت شیرین وهی مش عارفه ترد علی مروءة... مش هی

کانت بتقول علی حسام انه سقط من نظرها من کدبه... دلوقتی هی

بتکدب... هتدافع عن نفسها ازای ولا تصلح کدبها ده ازای؟؟؟

. 8 .

شيرين اقنعت نفسها انها مضطرة ان تخفى الحقيقة علشان  
تحقق طموحها وشغلها اللي عايشة علشانه وهى مختلفة عن حسام  
اللى على طول بيكذب  
اتصلت بياسر

”الو ياسر... انا قلت لاما على الجواز وعايزة تقابلك... فاضى  
بكرا“

اتفاجئ ياسر بكلامها  
”ايوه فاضى بس اقابلها ليه واقولها ايه؟؟“  
”هتقابلها كانك بتخطبنى بجد وبكرا عايزة اقابلك نروح مشوار  
وبعدين تيجى معايا ع البيت وهفهمك كل حاجة لما اشوفك“  
”حاضر... الساعة كام وفين“  
”هقولك وانا نازلة من البيت“

تانى يوم كانت الام فرحانة لما قالتها ان ياسر جاى النهاردة  
وعمالة تستعد هنجيب كذا ونعمل كذا وشيرين عادى جدا وهادية  
خالص ولا كأن حد جاى والام فسرت هدوتها ده بانها علشان  
عارفاه واخده عليه مش متوترة خالص وقبل المغرب بشوية نزلت  
شيرين باعتبارها رايحة تجيب ياسر من السوبر جيت علشان مش



عارف البيت ... انما فى الحقيقة رايحة تقابله بعد ما اتصلت بيه  
وحددت مكان قريب من بيته هتاخده منه... وصلت له وركب معاها  
”يا استاذة شيرين انا مش فاهم اقبال مامتك ازاي واقولها ايه“  
”هتقابلها كانك تعرفنى من الشغل وانا كنا مخطوبة وانت  
اتقدمتلى بعد ما فسخت الخطوبة... وحاول متغلطش فى حاجة فى  
كلامك انت من اسكندرية ولما تسألك فين اهلك قولها باباك تعبان  
ومامتك مقدرتش تسيبه وتيجى معاك... وانا هحاول ألحقك... ربنا  
يستر“

”حاضر... ربنا يستر“

مشيت شيرين بالعربية ووقفت قدام محل شيك ونزلوا مع  
بعض... واتفاجئ ياسر بشيرين وهى داخله محل ملابس رجالى  
ويتقوله ”تعالى نقى معايا“  
”انقى ايه حضرتك“

”نقى طقمين ليك ماهو مش معقول هتقابل ماما بهدومك دى“

”مالوش لازمة تكلفى نفسك“

”مش علشانك... علشان لازم تظهر قدام امى واختى بمظهر

كويس“

كان متغاض منها اوى وهى عمالة تتأمر وتتمنظر عليه كده وكان

نفسه يديها قلم على وشها ويقولها فوقى واتكلمى كويس ويسيبها

ويمشى... بس افتكرياسمين وفرحتها بتحديد جوازها وافتكرامه  
وابوه واخواته وحالهم لو سافر وحالهم لو مسافرش  
"طيب اتفضللى نقى حضرتك اللى تشوفيه وانا موافق"  
قعدت شيرين تختار وتشوف اللبس المناسب وهو ماسك نفسه  
ع الاخر من طريقتهابعد مانقوا طقمين  
"خليك لابس الطقم ده"  
وهو بيجز على سنانه "حاضر"  
وخذته وراحوا على محل ذهب وقالت للجواهرجى هات  
دبلتين

"بس انا مش هلبس ذهب... لو فضة ماشى"  
"خلاص خلاص طيب"  
واشترت دبلة ذهب ودبلة فضة وراحوا للبيت... وهى طالعة  
قالتله

"خد بالك مينفعش استاذاة وحضرتك والكلام الرسمى ده...  
اتعامل معايا كاننا نعرف بعض من زمان... وخلي بالك من كلامك  
مع ماما"  
وصلوا البيت ورحبوا بيه جدا ومامتها ومروة كانوا بيتعاملوا  
معاه بكل ود لما شافوه ذوق ومؤدب وطبعاً كانت شيرين قايلة لامتها  
متسألوش كتير لانه خجول جدا ومفيش داعى للاحراجه بالاسئلة

وعدت المقابلة على خير ولبسوا الدبل واتفقوا انهم يكتبوا  
الكتاب الخميس الجاى علشان يبدأوا التجهيز للسفر... وفى نهاية  
المقابلة قالت الام

”لو عايزين تنزلوا تخرجوا شوية انزلوا مع بعض“  
فاضطروا يتظاهروا بالموافقة والسعادة ونزلوا فعلا...  
”تعالى نستغل نزولنا ونروح نشوف بدلة لكتب الكتاب“  
”مفيش داعى انتى النهاردة اتكلفتى كتير“  
”يعنى انا لو مجيبتش انت هتقدر تجيب...انت ممكن  
ميكونش معاك ٥٠ جنيه فى جيبيك“

لسه هيرد عليها لقوا خبطة على كبوت العربية وحسام ظهر  
فجأة وفتح باب عربيتها وهو بيشدها من العربية  
”مين ده يا انسة يا محترمة...هو ده اللي سيبتينى علشانه...  
كنتى بتضحكى عليه...تلاقيكى كنتى ماشية معاه وانتى مخطوبالى “  
”انت اتجننت سيبنى يا حسام واتكلم كويس“  
نزل ياسر بسرعة علشان يخلصها من ايده  
”ايوه اتجننت مانا كنت نايم على ودانى وانتى بتتسرمرحى  
مع اللوح ده“

هجم عليه ياسر وخلصها من ايده.. وقاله وهو بيضربه

"اللى بتكلمها دى خطيبتى... واياك تتعرض لها تانى والا  
هتشفوف اللى عمرك ماكنت تتخيله... غور من هنا"  
رد حسام باستغراب  
"خطيبته... امتى ده... ماشى يا شيرين انا هوريكى"  
"قلتلك اياك تتعرض لها تانى"  
بكل عصبية ركب حسام عربيته ومشى بسرعة... وجهت  
شيرين كلامها لياسر وهى بتقوله  
"ميرسى ياياسر... ده انت طلعت راجل اهو"  
"تصدقى انك صحيح مش محترمة انا مستحمل كلامك  
واهاناتك من ساعة مااتفقنا على الاتفاقية السوداء دى... ملعون ابو  
القرش اللى يبجى بالذل... معطلكيش وشوفى لك شخشيخة غيرى  
تلعبى بيها"

## . 9 .

فوجئت شيرين برد ياسر وفعلا حسنت انها كانت اوفر في  
طريقتها معاه وكلامها كان جارح وهو ما ساءش لها في حاجة بل  
بالعكس من غيره مش هتعرف تسافر... تسافر... انتبهت وكان على  
بعد خطوات فلحقته ومسكت ايده

"ياسر انا اسفة مقصدتش اضايقك"

"لو سمحتى انا من اول لحظة وانا بعاملك باحترام وانتي  
بتتعمدى اهانتى وانا ساكت بس الحكاية زادت اوى وكل ده فى  
اول يوم... يعنى واضح اننا مش هنقدر نساfer مع بعض لاننا هنبقى  
مضطرين نتعامل يوميا مع بعض وشكله مش هينفع"

"يعنى انت مش محتاج الشغل"

"وهو علشان محتاج ادوس على كرامتى"

"لا مش قصدى بس مش بسهولة كده تضيع فرصة زى دى"

"لا مش بسهولة... بس اللي صعب عليه انى اتحملك

واتحمل تكبرك وتعاليكى عليه"

"انا قلتلك اسفة... اعمل ايه تانى؟"

"متعمليش حاجة... روحى ارجعى لخطيبك وسافرى معاه"

"خلاص يا ياسر انت حر... بس انا اعتذرت لك"

رن موبایل یاسر ولما رد

”ایوه یایاسمین طیب متعیطیش انا جای حالا“

”بعد اذنک یاستاذه شیرین... اخویا تعب وراح المستشفى

لازم اروح له حالا... ربنا یوفقک فی حیاتک“

”میرسی... طیب تعالی اوصلک المستشفى“

”لا مفییش داعی“

”لا انا کده کده مش هقدر اطع دلوقتی علی طول هقول ایه

لما... تعالی اوصلک وابقی ارجع تانی“

رکب یاسر معاها ووصلته للمستشفى وهی فی الطریق سألته

اخوه تعبان عنده ایه؟؟ قالها ان اخته قالتله ان مصطفی اخوه

الصغیر وهو بیلعب وقع من علی السلم ومقدرش یقوم وباباه اخده

علی المستشفى وتقربیا رجه اتكسرت... بعد ماوصلته للمستشفى و

ودخل... نزلت ودخلت المستشفى وسألت فی الاستقبال عن حالة

الولد وعرفت ان فعلا رجه اتكسرت ودفعت الحساب وكان بسیط

لانها مستشفى حکومی بسیط.

\* \* \* \* \*

یاسر دخل الطوارئ لقی الدكتور بیجیس مصطفی وهو بیعیط

وكان باباه ومامته موجودین... ولقی باباه بیاخده علی جنب بره

”یاسر انت معاک فلوس“

"كام يعنى"

"انا مش عارف بس شايف انك لابس جديد لبس شكله غالى

وهتستخسر فى اخوك"

"لا يابابا ده لبس استلفته من واحد صاحبي... انا مش ممكن

استخسر لو معايا"

"طيب انا مش معايا غير ٢٠ جنيهه وامك ١٠ جنيهه شوف

الحساب كام وكمل انت"

"حاضر يابابا"

خرج ياسر وهو عمال يفكر طيب كل اللي معاها ٥٠ جنيهه

ياترى هيطلع حساب المستشفى كام؟؟ ولو صرفوا كل الفلوس اللي

معاها هما الثلاثة البيت هيصرف منين... كان لازم يسيب الشغل

فى الورشة علشان شيرين... بس هو سابه علشان مبادئه مش علشان

حد.... والشغل اللي كان هيغير حياته رفضه برضه بسبب

شيرين... لا بسبب كرامته... كل ده ولسه هيقول ايه لياسمين اللي

وعدها انها تتجوز فى اقرب وقت... مش ممكن يرجع فى كلامه

ويكلم شيرين تانى... او يرجع فى كلامه... وصل للاستقبال وسأل

عن حساب علاج مصطفى الموظف قاله ان الحساب مدفوع... ولما

سأله مين اللي دفع.. وصف له اوصاف شيرين... وبقي مش عارف

يتصرف ازاي.... يكلمها يشكرها ولا ميكلمهاش زى ماقرر

خرج باباه وهوييسأله عن الفلوس...قاله انه دفع خلاص...  
وبلا ارادية منه مسك تليفونه واتصل بشيرين  
كانت شيرين لسه فى طريق رجوعها للبيت لما رن تليفونها  
"الو... شكرا على انك دفعتى حساب المستشفى... ومكش له  
لازمة انا الحمدلله معايا فلوس مش زى ماقلتى"  
"مفيش داعى للشكر دى حاجة بسيطة بعذرلك بيها عن  
اسلوبى وطريقتى البايخة"  
"حصل خير ... بس تمن اللبس وحساب المستشفى  
هرجعهموك فى اقرب وقت ان شاءالله"  
"طيب هو مفيش مجال انك تفكر فى اتفاننا حتى لو قلت لك  
انه بالنسبة لى فرصة كبيرة مش هتتكرر فى حياتى كلها ولو  
ماسافرناش الفرصة دى هتضيع عليه"

بقى مش عارف يرد يقول ايه وهو محتاج فعلا الشغل ده

"احنا نتفق على اتفاق جديد"

"ايه هو؟؟"

"ان احنا الاتنين نبقى عارفين اننا محتاجين بعض علشان

السفر يتم ولازم نحترم بعض ومفيش حد له فضل على التانى"

"اكيد طبعا كلامك صح"



”خلاص احنا على ميعاد كتب الكتاب ان شاء الله“

”ميرسى يا ياسر“

”لا مش ميرسى... احنا الاتنين محتاجين السفر يبقى مفيش

شكر بيننا“

”صح معاك حق“

”انتى وصلتى البيت ولا لسه؟؟“

”لا قريت على البيت“

”طيب خلى بالك واوعى الواد الرخم ده يتعرض لك تانى قولى

جزر هتلاقينى عندك على طول“

”ههههههه متقلقش عليه انت خلاص خوفته وهو جبان مش

هيظهر تانى... انا بقيت تحت البيت اهو... سلام بقى“

”مع السلامة“

طول طلعت شيرين البيت وهى مرتاحة جدا ان الشغل  
مراش عليها وهتسافر وتحقق نجاح اكبر بالفرصة الجديدة وفضلت  
تحلم وتحلم  
وقررت انها تحاول تستحمل ياسر علشان السفر وزى ما قال  
فعلا هما الاتنين محتاجين بعض... وافكرت انهم محدودش  
هيكاتبوا الكتاب فين ومين هيكون وكيلها وهتلبس ايه؟؟؟ وكل ده  
هى مش فاضية خالص لانها يدوب تقدر تاخذ اجازة يوم الخميس  
علشان كتب الكتاب... اتفقت مع مامتها ان تبلغ خالها الكبير  
بالميعاد علشان يحضر ويبقى وكيلها...وقالت لمامتها انها تفضل ان  
يكون كتب الكتاب فى البيت وفى اضيح الحدود ولما مامتها  
اعترضت قالت لها علشان ياسر بيتحرج ومش بيحب المظاهر دى...  
وصدقتها مامتها وتانى يوم اتصلت شيرين بياسر وقالت له يتفق مع  
المأذون على الميعاد والعنوان وان يوم الاربعاء بالليل يتقابلوا علشان  
ينزلوا يجيبوا لبس مناسب... وطبعاً ياسر سمع كلامها... وعزمت  
شيرين اقل عدد من معارفها... وقبل كتب الكتاب بيومين سألتها  
مامتها

"انتي حجزتى الكوافير والاستديو"

"لا ياماما كوافير ايه انا هلبس هنا وخلص"

"ليه هو انتى هتلبسى ايه"

"هنزل بكرة اشوف تايبير"

"تايبير ايه مش كفاية انا ساكتة على جواز من غير فرح ولا

فستان ابيض وانتي اول فرحتى تقولى تايبير ومن غير كوافير ولا

استوديو"

"يعنى ياماما هتفرق معاكى الكوافير والاستوديو فى ايه"

"احس انى بنتى هتتجوز...يبقى فيه صورة اعلقها على

الحيطة افرح بيكى...انتى مش عايزانى افرح"

"لا افرحى بيه من غير الحاجات دى"

"والله مايحصل انتى مش مطلقة ولا ارملة علشان تكتبى كتابك

سكىتى كده مش كفاية ملكيش بيت هنا وهتتجوزى فى بلد تانية"

"طيب ياماما ايه اللى يريحك دلوقتى"

"تلبسى فستان وياخدك من الكوافير وتتصوروا فى الاستوديو

وبعد كده تيجوا تكتبوا الكتاب وبعدين ياخدك وتتعشوا فى اى

حثة"

شيرين وهى مضطرة"حاضر ياماما"

نزلت مع ياسر وراحوا اشتروا بدلة وراحوا حجزوا الكوافير  
والاستوديو... وبعدين راحت هي لوحدها اشترت فستان  
وفى الميعاد المتفقين عليه جالها ياسر ومعاه ابراهيم عند  
الكوافير وكانت مروة معاها... اتفاجئ ياسر بشيرين... جميلة جدا  
وكأنه اول مرة بيشوفها... بس للأسف الحلو مبيكملش كل اللي  
شافه منها تسلط وغرور وقسوة... خسارة الجمال ده يكون معندوش  
قلب ولا مشاعر... اتفاجئ ابراهيم ومال على ياسر وقاله بالهمس  
”هى دى اللى مكنتش عايز تتجوزها... دى الواحد يتمنى لو  
يتجوزها يوم واحد بس“

اتضايق ياسر من كلام ابراهيم وبص له بصة خلاه سكت

خالص

واتجهت له شيرين ومشيو جنب بعض لحد العربية... فمروة  
اقترحت ان ياسر يسوق وشيرين جنبه وهى وابراهيم يقعدوا ورا.  
راحوا الاستوديو... وثناء التصوير كانت اول مرة تتلامس  
ايديهم كانت شيرين مكسوفة جدا ولما مسك ايديها حسست كأنها  
اتكهربت فشدت ايديها بسرعة فاستغرب المصور وقالها تعمل اللى  
يقولها عليه... كانت لحظات مرت وكأنها ساعات من ارتباكها  
وخصوصا الصورة اللى كان فيها ياسر محاوط وسطها بدراعه وايده  
التانية ماسك دقنها وهما الاتنين وشهم متقابل ونظراتهم مباشرة كل

فى عين الاخر...حسب تعليمات المصور... ومن ارتباكها كانت الصورة كل مرة مش مظبوطة فاضطر المصور لاعادتها ٤ مرات... اما ياسر كان سعيد جدا بتكرار الصورة رغم ان عمره ٢٨ سنة الا ان دى اول مرة يكون قريب اوى كده من بنت... كان مرتبك بس كان مسيطر على ارتباكه وحس بارتباكها وخاف لو اتكلم ارتباكها يزيد... رغم انه مكنش عايز الصورة تخلص ولا الوقت يعدى... "اخيرا خلصت الصورة"ده اللى قالت له شيرين لنفسها بعد انتهاء اصعب لحظات مرت عليها رغم انها مكنتش تتخيل انها بتتكسف وهى عارفة انها جريئة بس الوضع كان جديد عليها

بعد ماخلصوا التصوير راحوا البيت وتم كتب الكتاب فى حضور خالها وناس مش كتير من المعارف... ولما تم كتب الكتاب مامتها قالت لهم يالا انزلوا اسهروا واحتفلوا مع بعض... فصممت شيرين ان مامتها ومروة ينزلوا معاهم وبعد اعتراضهم وتصميمها نزلوا معاهم... وهما نازلين على السلم مد ياسر ايده علشان يمسك ايدها فبصت له بدهشة وتعجب...ابتسم وشاور لها وقال بهمس

"علشان ماما"

فمدت ايدها فى ايده ومسك ايدها وشد عليها بحنية ورقة فارتبكت تانى وكانت هتتكعبل فى السلم...فضحك وقالها "طيب الاستوديو وعديناها... هو حصل ايه دلوقتى"

حست انه كاشفها فاتخرجت اكثر وقالت بنبرة حادة

”انا هنزل لوحدى الفستان هيكلعبنى ولازم امسكه“

نزلوا وراحوا اتعشوا مع بعض ولما مامتها سألته

”هترجع اسكندرية امتى يياسر“

فجاوبت شيرين”بكرة الصبح “

الام”وهتبات فين يابنى...تعالى بات عندنا “

صرخت شيرين”بيات فين ياماما هو حاجز اوضة فى اوتيل

ومسافر الصبح“

”شكرا يا حاجة الله يخليكى...انا مسافر الصبح“

وهما راجعين متأخر العربية وقفت فجأة ولما نزل ياسر يشوف

فى ايه.. اتفاجأت شيرين بياسر بيقلع الجاكيث وبيشمر القميص

وعمال يشتغل فى العربية وكأنه فى ورشة ... بقت مكسوفة ومش

عارفة تتصرف لحد ماخلص والعربية اشتغلت تانى وهو ببسوق

وبيوصلهم... سألته مامتها

”ايه ده يياسر انت بتفهم اوى كده فى العربيات“

طبعاً مروة وشيرين بصوا لبعض فرد هو قبل شيرين

”ايوه يا حاجة اصل عندى عربية فى اسكندرية بس مش بحب

اجى بيها هنا“

ولما وصلهم البيت وركن العربية مروة وامتها سبقوا وشيرين  
كانت مستننية تاخذ المفتاح  
وهو بيديها المفتاح  
"تصبحى على خير يا عروسة"  
"انت ايه اللي عمال تقوله وتعمله ده... اوعى تكون فاكر ان  
الجواز ده ممكن يبقى حقيقى فيه فروق كتير بيننا ومش ممكن حد  
فيينا ينساها.. وياريت تاخذ بالك من تصرفاتك وكلامك بعد كده مش  
قادر تنسى انك ميكانيكى كان فاضل تنام تحت العربية.. وكل  
شوية حاجة حاجة مش عارف تقول طنط"

بعد الكلمتين البايعين اللى شيرين قالتهم لياسر... شد ايدها  
وفتحها ورزح المفتاح فى ايدها وقالها "تصبحى على خير" وسابها  
ومشى

لقيت نفسها واقفة لوحدها وهو ماشى بعيد وحست انها كانت  
بايخة فى كلامها معاه بس هو اللى تمادى فى هزار مالوش لازمة  
وكان لازم توقفه عند حده ويفتكر الاتفاق اللى بينهم ... طيب هى  
ليه بتفكر كده مش يمكن كان بيتصرف بتلقائية وهى اللى اساءت  
الرد والتصرف... وايه الارتباك ده اللى كانت فيه ... كل ده كانت  
شيرين بتفكر فيه خلال الايام اللى بعد كتب الكتاب وفى يوم فى  
نص الاسبوع استدعاها مدير الفرع وقالها ان ميعاد السفر اتقدم  
وقدامها ١٠ ايام فقط للسفر ... فوافقته... واتصلت بياسر والمكاملة  
كانت متحفظة كثيرا من الطرفين ولم تستغرق اكثر من دقيقتين  
يدوب عرفته ان كل الاوراق خلصت وميعاد السفر اتحدد وانه يكون  
اتأخر



من بعد اللي حصل بعد كتب الكتاب قرر ياسر انه يتعامل مع  
شيرين بكل جدية وانه غلط لما اتعامل معاها بتلقائية وحاول يخفف  
الاحراج اللي كانت فيه واللى ادى لنتيجة عكسية واحرجته اكثر  
وفكرته بالفروق اللي بينهم واللى مستحيل هينساها  
لما اتصلت بيه وحددت ميعاد السفر... قال لاسرته وحدد مع  
حسن خطيب ياسمين ان قدامهم ٣ شهور بالكثير ويكونوا جاهزين  
ولف عل كل اصحابه يستلف من ده ومن ده علشان لما يسافر  
يكون معاه فلوس ومايحتاجش لشيرين خالص... وفعلا قدر يجمع  
مبلغ كويس لحد مايعرف يستقر وينظم اموره ويسدد كل اللي وراه.  
يوم السفر راح لشيرين زى ماتفقوا وكان مأجر تاكسى يروحوا  
المطار بيه علشان يروحوا هما الاتنين بس من غير ماحد يوصلهم

\* \* \* \* \*

لما وصلوا المغرب كان فيه موظف من الشركة مستنيهم ووصلهم  
لحد العمارة اللي فيها سكن المغتربين ووصلهم لحد شقتهم وهى شقة  
فى الدور التانى وجيرانهم فى نفس الدور مصريين (جلال موظف  
بالحسابات ومراته وولاده الطفلين التوأم الصغيرين)  
سلمهم الموظف نسختين من مفتاح الشقة وقالهم ان كمان  
يومين هيبداوا الشغل والعربية هتيجى تاخذ الموظفين الساعة ٩  
الصبح

بعد مامشى الموظف وفتح ياسر باب الشقة ودخلو الشنط...  
دخلت شيرين تتفرج على الشقة...هى مش كبيرة بس راقية  
ونضيفة والفرش اللى فيها شيك... فى البداية المطبخ وبعدين صالون  
وسفرة وبعدين جوه فى الحمام وسط اوضتين... بتفتح شيرين الاوضة  
الاولى لقيتها اوضة نوم شيك وواسعة ببلكونة... وبتفتح الثانية لقيتها  
مكتب وكمبيوتر وتليفزيون وكنبة كبيرة يعنى حجرة معيشة ومكتب  
فى ان واحد... وقفت متسمره مكانها ومشلولة التفكير

كان ياسر دخل كل الشنط ولاحظ وقوف شيرين قدام اوضة  
وساكنة فاستغرب وقرب يشوف فى ايه ولما شاف الاوضتين

”مالك؟؟؟ متقلقيش مفيش مشكلة“

”يعنى ايه مفيش مشكلة .. انا مش ممكن انام الا فى اوضة

لوحدى“

”طيب انا بقولك متقلقيش هنام انا على الكنبة لحد ما اشتري

سرير ونعيد تنظيم الشقة براحتنا وزى ماتحبنى وقبل مانمشى نبقى

نرجع كل حاجة زى ماكانت.. متخافيش واطمنى انا مش هنسى

الاتفاق“

اخذت نفس بعد ماكانت مش قادرة تتنفس واطمنت فعلا ولو

ان فكرة انها تعيش فى بيت واحد مع راجل غريب كده لسه صعبة

عليها

اخذت شنطها الكثير ودخلتها الاوضة واخذت شنطة ايدها

وجت تنزل

"ايه ده انتى نازلة"

"ايوه"

"رايحة فين"

"نازلة شوية"

"مش كنتى ترتاحى الاول... طيب استنى انا جاى معاكى"

"لا مالوش لزوم خليك هنا"

"لا هبقى قلقان ومينفعش اسيبك تنزلى لوحدك وياريت تخلى

بالك اننا قدام الناس ازواج عاديين نبقى لسه داخلين تنزلى لوحدك

بعد دقائق مينفعش... لازم تاخدى بالك من الحاجات دى"

"خلاص تعالى... انا لمحت سوپر ماركت هنا فقلت ننزل

نشترى شوية اكل يبقى موجود"

"طيب يالا بينا"

وهما نازلين كان جلال بيفتح باب شقته وعرفهم بنفسه

واتعرف عليهم ونزلوا راحوا جابوا الاكل ورجعوا البيت

"انا جعان.. مش جعانة؟"

"لا جعانة... بس انا مش بعرف اطبخ انت بتعرف"

"ياستى تعالى نحاول نعمل اى حاجة المهم ناكل"

”طيب هدخل اغير هدومي واجى نشوف هنعمل ايه“

لما رجعت المطبخ كان ياسر كمان غير هدومه وواقف يبص

للاكياس اللى جايبينها

”يعنى ياشيرين مش بتعرفى تعملى حاجة خالص...جعان“

”انا جايبة معلبات نفتح بقى اى حاجة وناكل وخالص لحد

مانبقى نشوف حل فى ورطة الاكل دى هنعمل فيها ايه؟؟“

وهما بياكلوا كانت شيرين مكسوفة وهى بتاكل وبعدين لقيت

ياسر بيتصرف بتلقائية فبدأت هى كمان تتصرف بتلقائية

كانوا بالليل بعد الاكل دخل كل واحد علشان ينام هى فى

الاوضة وهو على الكنبة

لما صحيت الصبح قامت مرتاحة وكانت نايمة مطمئة على غير

ماكانت متخيلة بس وهى خارجة من اوضتها شافت ياسر وهو نايم

على الكنبة... الكنبة شكلها مش مريحة ايده واقعة بره ورجله

متشعلقة على ظهر الكنبة... فصعب عليها وخصوصا لما قارنت بين

نومها المريح ونومه غير المريح بالمره

غيرت هدومها ولبست ونزلت وهو نايم

\* \* \* \* \*

قام ياسر من نومه لقي اوضة شيرين مفتوحة... دور عليها فى

البيت ملقهاش... وافتكر انهم لسه مجابوش خطوط موبايلات يعنى

مش عارف يتصل بيها... فانتت ساعة وهو هيموت من القلق عليها  
وكل الافكار دارت فى دماغه... ياترى ممكن تتوه وليه لا مش بلد  
متعرفش عنها حاجة... لاحسن يحصلها حاجة ولا حد يتعرض لها  
بأى سوء... وفضل يبص كل شوية من البلكونة وشوية يروح عند  
الباب... وبعد ساعة سمع مفتاح الباب وهى داخلة  
وبكل عصبية ونرفزة وباعلى صوت  
"انتى كنتى فىن؟؟ ازاي تنزلى من غير ما اعرف انك نازلة او  
رايحة فىن"

## . 12 .

وقفت شيرين مذهولة من الطريقة اللى كلمها بيها ياسر وكانت  
لسه مقلتش الباب ولقى شيالين بيحطوا حاجات جوه البيت...  
وشييرين بتقولهم "شكرا على تعبكُم"  
قفلت الباب ودخلت تجرى على اوضتها من غير ماتتكلم...  
وهى معدية من جنب ياسر لمح دموع فى عينيه... فدخل وراها قبل  
ماتقفل اوضتها عليها... وسألها بصوت هادى  
"كنتى فين"

ردت بنشيج "انت بتزعقلى كده ليه وقدام الناس كمان"  
"انا اسف كنتى فين وليه مقولتليش قبل ماتنزلى"  
"انت لو كنت استنيت شوية كنت شفت انى نزلت اجيبلك  
سرير"

"متزعليش منى بس والله كنت هموت من القلق عليكى"  
"وانت تقلق عليه ليه هو انا صغيرة"  
"ايه البياخة دى... قللقان عليكى علشان احنا فى بلد  
منعرفهاش ومنعرفش المكان اللى احنا فيه امان ولا لأ... و١٠٠ فكرة



انهم يخلوا التلفزيون والكمبيوتر مع الصالون ويسيبوا الكنبه  
والمكتب والسرير فى الاوضة لحد مايجيبوا دولاب صغير يبقوا  
يشوفوا هيشيلوا ايه تانى... وبعد كام ساعة كانوا خلصوا.. والباب  
خبط... قام ياسر يفتح الباب

”سلامو عليكو.. انا جلال جاركم فى الشقة اللى جنبكم“

ياسر ”اهلا وسهلا اتفضل“

دخل جلال البيت... وعرفه ياسر بيهم

”اهلا يااستاذ جلال انا ياسر ودى مراتى شيرين“

جلال ”اهلا يامدام شيرين...تشرفنا“

شيرين ”اهلا وسهلا فرصة سعيدة“

جلال ”انا زميلكم فى الشركة وقلت بما اننا مصريين زى بعض

فى الغربية نتعرف ونبقى اصحاب“

ياسر ”طبعا طبعا منورنا... وحضرتك بقى فى قسم ايه“

”انا فى الحسابات... وعرفت ان مدام شيرين هتكون رئيسة

العلاقات العامة لفروع المغرب... وحضرتك يااستاذ ياسر“

”انا موظف فى الادارة ان شاءالله“

”غريبة ان جوز رئيسة العلاقات العامة يبقى موظف عادى

هاهاها“



اتضايقت شيرين من طريقته وخصوصا ان نظراته ليها اى  
واحدة تقدر تفسرها انها نظرات مش مريحة  
"وحضرتك جيت لوحدك ليه؟؟ فين المدام"  
بص لها ياسر وفهم انها اتضايقت زيه من الراجل الغتت ده  
وقال فى سره...اخيرا لسانها نفعنا بحاجة وكتم ضحكة خفية  
مظهرتش على وشه... ورد جلال  
"مراتى من ساعة ماخلفت التوأم مى وملك وهى مش فاضية  
لحاجة خالص ولا حتى انا... بكرة تجرب ياياسر هاهاها"  
ياسر"ان شاءالله"  
"وهتنزلوا الشغل معانا فى العربية مش كده العربية بتيجى  
الساعة ٩ الاربعة... على فكرة ياياسر ده فيه شيفت بالليل لموظفين  
الادارة ويببقى مرتبه ازيد... اكيد هيعرضوا عليك"  
"ربنا يسهل"  
شيرين كانت مش طايقة جلال وحست انه هيفضل قاعد  
فقامت وقفت ووجهت كلامها لياسر  
"اجيب الشنطة ياياسر انت جاهز مش كده"  
رد ياسر بعد مافهم انها بتوزعه"اه جاهز"  
وفعلا جابت شيرين شنطتها لما لقت جلال لسه قاعد ومش  
بيتحرك

”فرصة سعيدة يااستاذ جلال معلش ملحقناش نقعد معاك المرة  
دى علشان نازلين“

”رايحين فين ممكن ادلكوا على اللي انتوا عايزينه“  
كان ياسر فاض بيه من غلاسة جلال

”لا شكرا يعنى احنا ٢ عرسان جداد رايحين نتفصح شوية  
ومحتاجين نقعد مع بعض لوحدنا ولا ايه؟؟“

”اه طبعاً يالا استئذن انا وابقى اجى فى وقت تانى“

شيرين”تبقى نشوف حضرتك فى الشغل بقى علشان احنا  
النهادة وبكرة بنتفصح ومش جايين البيت غير متأخر“

قام جلال وهو ماشى وياسر بيوصله مال عليه ووشوشه وقاله

”انتوا صحيح عرسان جداد.. لما معاك عروسة حلوة زى دى

تخرجوا ليه؟؟ انا لو منك مسيبهاش من حضنى“

رد ياسر بعصبية

”ماتحترم نفسك انت ايه اللي حشرك فى الكلام ده“

اتفاجئ جلال بالرد” ههه انا بهزر معاك يالا سلامو عليكو“

قفل ياسر الباب ورزعه وراه

”انت زعقت له ليه“

رد وهو مازال منفعل”راجل بارد وقليل الادب متتعامليش

معاه“

"ليه ويعنى ايه متعاملش معاه"

"كده علشان مش محترم... وبعدين ايه اللي قعدك معانا طول

ماهو هنا كنتى ادخلى اوضتك"

"ليه يعنى مانا كل شغلى مع رجالة ايه الجديد"

"الجديد انك مراتى وانا محبش ان مراتى حد يبصلها"

"انت مش ملاحظ انك بتزعقلى تانى "

"لو سمعتى الزبالة ده قال ايه هتعدرينى"

حست شيرين بفرحة خفية من انفعال ياسر ومكنتش متضايقه

لان جلال فعلا كانت نظراته ليها وقحة وممكن يقول اى حاجة

"هيقول ايه يعنى؟"

"خلاص مالوش لازمة بس ياريت متتعاملش معاه تانى"

"حاضر"

"ياسلام عليكى وانتى بتقولى حاضر كده...والنبى ماتردى

بكلام بايخ تانى"

كانت طريقته لطيفة وتقبلتها شيرين بدون رد بايخ زى ماقال

واكتفت بابتسامه ونزلوا فعلا...راحوا اتغدوا وحاولوا يتعرفوا على

البلد وهما ماشيين فى الشارع كان فيه زحام حسست بيه شيرين

بيمسك ايدها وبص لها

"علشان الزحمة"

الغريب ان سابت ايدها تغرق فى ايده وحست انه ماسكها  
بقوة وحنان فى نفس الوقت احساس ان حد خايف عليها ده كان  
مخليها فى سعادة من يوم ماتوفى باباها وهى فى الكلية وهى  
محستش انها مسئولة من حد كانت حاسة ان هى اللى مسئولة عن  
امها واختها... دلوقتى وهى حاسة انها مسئولة من ياسر مخليها  
سعيدة... عقلها فكرها ان مينفعش تستسلم حتى لو كانت حاجة  
بسيطة زى انه يمسك ايديها... طردت الافكار من عقلها وسابت  
نفسها مستسلمة للسعادة على الاقل الفترة البسيطة اللى هما  
خارجين فيها مع بعض.

## . 13 .

لما رجعت شيرين كانت ندمانة انها بدأت تتساهل مع ياسر  
فى بعض التصرفات وكانت خايفة انها تبدأ فى التنازلات وقررت  
انها لازم ترجع تتعامل معاه بحزم زى الأول

\* \* \* \* \*

ياسر كان سعيد ومش مصدق التحول اللي حصل فى تعامل  
شيرين معاه على الاقل الايام تمر بدون مشاكل وحرق دم من كلامها  
اللى زى الطوب

\* \* \* \* \*

كان متبقى يوم واحد قبل بدء الشغل فى اليوم ده لما صحى  
ياسر كانت شيرين مازالت فى اوضتها قعد يستناها لما تصحى  
براحتها علشان يفطروا مع بعض او يشوفوا هيقضوا اليوم ازاى...  
اتأخرت وتأخرت ولما قلق عليها خبط الباب بشويش علشان  
ميزعجهاش وعلشان يطمئن عليها... فقامت فتحت له

"ايه يا شيرين انتى لسه نايمة"

"ايوه"

"طيب مش هتقومى نفطر وننزل شوية"

”لا مليش نفس ومش هنزل النهاردة... عايزة اقعد لوحدى لو  
انت عايز تنزل براحتك انا مش نازلة“  
”مالك فيه ايه؟؟“

”مفيش حاجة محتاجة ارتاح وانام براحتي علشان الشغل  
بكرة اكون فايقة ومستعدة“  
”طيب براحتك“

دخلت شيرين وقفلت على نفسها الاوضة وحست براحة انها  
اتعاملت معاه كده... وفعلا متقابلوش غير تانى يوم وهما نازلين  
الشغل... وهما خارجين من الباب قابلوا جلال هو كمان خارج من  
بيته... ومد ايده يسلم على شيرين  
”يا صباح الخير بالعرسان“

فجأة دخل ياسر فى النص ومد هو ايده للسلام على جلال  
وهو بيرد التحية وقبل مايدى اى فرصة لجلال بالكلام كان مسك  
بايده الثانية ايد شيرين ونزلها قدامه وهو فى النص بينها وبين  
جلال وبيقولها

”ياللا يا حبيبتي علشان متأخرش“  
نزلوا وركبوا الباص جنب بعض وسألها ياسر  
”مالك يا شيرين متغيرة من امبارح“

”مفیش حاجة.. وبعدين انت عارف طبعی منین علشان تقولی

متغیرة مش یمکن ده الطبیعی بتاعی”

”بس الیوم اللى نزلنا فیہ مکتیش كده”

”قصدك ایه؟؟ كنت ازای یعنی”

”كنتی بتتعالمی معایا احسن من كده”

”انا معملتش حاجة تضایقك انا بتعامل معاك عادى”

”ماشى اللى تشوفیه”

لما وصلوا الشغل ماتقابلوش خالص غیر وهما راجعین وكان كل

واحد بیتنجب الكلام مع التانى ولما وصلوا البیت دخلت شیرین

على اوضتها

”استنى یاشیرین قبل ماتنامى او تقفلى علیكى اوضتك عایز

اقولك حاجة”

”ها”

”زى ماجلال قال عرضوا علیا شیفت باللیل وانا وافقت ایه

رأیک”

”رأیى فى ایه انت حر... وبعدين احسن علشان كل واحد

یقعد فى البیت براحتہ ومحدش یضایق حد”

قالت الكلمتین ودخلت اوضتها ووقف یاسر متضایق من

كلامها قد كده هی متضایقة من وجوده وما صدقت انه یبعد عنها...

اومال يعنى انت كنت فاكر ايه؟؟ رد عليه صوته الداخلى.. كنت  
فاكرها هتقولك بلاش تقبل؟؟ اه ليه لأ..كان بيتمنى انها تقوله بلاش  
يقبل شيفت الليل وهو كان هيرفضه حتى بالزيادة اللي هو محتاجها  
كان مستعد يتنازل عن فرق المرتب لو كانت قالتله بلاش تسيبنى  
لوحدى.. مالك يياسر فوق انت بتحلم هي كانت واضحة معاك من  
البداية وقالتلك ان فيه فروق بينكم مستحيل تتنسى... فضل فى  
حوار طويل بينه وبين نفسه وحس انه اتخنى نزل من

\* \* \* \* \*

لما شيرين دخلت اوضتها كانت متضايقه انه هيشغل بالليل  
ويسببها لوحدها معنى كده انها هتقابله قليل هي شغلها من ٩ ل ٦  
مساء وهو من ٨ بالليل ل ٨ الصبح... وصوتها الداخلى رد عليها  
وانتى زعلانة ليه مش ده اللي انتى عايزاه... قالت كده أحسن

\* \* \* \* \*

كام يوم كانت شيرين خايفة تنام وياسر مش فى البيت وبعد  
كده اتعودت وحصل ان فى اكثر من مرة جه ياسر بدرى ع الساعة  
٥ الفجر وعرفت منه ان الشغل لما بيكون قليل مجموعة بيمشوا بدرى  
والباقي بيستنى المعاد الرسمى وهكذا بيبدلوا مع بعض  
كان جلال كتير بيحاول يكلمها فى اى حاجة بره الشغل  
وكانت بتصدده وبترد عليه كلام يخرجه وهو مفيش فائدة وكانت مش



بترتاح لنظراته ليها ومر شهرين ونص على الحال ده مش بتشوف  
ياسر الا قليلا وبالتالي مفيش تعامل بينهم الا فى اضيق الحدود ويوم  
الاجازة بتقفل اوضتها عليها علشان متعاملش معاه وهو حس انها  
بتتجنبه ففضل انه مبيقاش تقيل عليها واحترم رغبتها دى

و فى يوم وهى راجعة من الشغل قعد جنبها جلال فى الباص

”اخبار ياسر ايه“

”كويس الحمدلله“

”تصدقى ان حياتكم غريبة“

”غريبة ازاي يعنى“

”يعنى انتوا لسه متجوزين من كام شهر ولسه مخلفتوش ولا  
حاجة وانتي بتشتغلى طول النهار وهو بيشتغل طول الليل... يبقى  
بتتعدوا مع بعض امتى“

”وانت دخلك ايه؟؟ والله انت اللى حاجة غريبة بتتدخل فى

خصوصيات غيرك ليه“

”انا بنصحك بس“

”متشكرين يا سيدى وكل واحد حر فى حياته“

”انا بس مستغرب هو ازاي سايب الجمال ده كله وبيبات فى

الشغل ويسيبك لوحدهك“

”لا بقى انت زودتها اوى قوم من جنبى لاوريك مقامك قدام

الناس”

”خلاص خلاص قايم الحق عليه انى بنصحك واعرفك ان

الراجل لو حس ان مراته بعيدة عنه لازم يبص بره”

قام جلال من جنبها وقعد فى مكان تانى قام بعد ماسابها

تغلى من كلامه الوقح... وتدخله فى مالا يعنيه... بس معنى كلامه

ده ايه؟؟؟

## . 14 .

اتضايقت شيرين من كلام جلال وطلعت وهى متنرفة منه  
ودخلت البيت وهى قرفانة منه وبتمتم فى سرها  
"راجل لا يطاق"  
سمعتها ياسر وهى بترزع الباب  
"مين اللى لا يطاق"  
"الزفت اللى اسمه جلال ده بجد بجح ووقح وقليل الادب"  
"عملك ايه؟؟ انا مش قايلك متعامليش معاه"  
"هو انا طايقاه هو اللى سخيف وبيتدخل فى حياتنا"  
"قالك ايه منرفك كده"  
"اهو قليل الادب وخالص"  
"انا هوقفه عند حده"  
وجرى ياسر ناحية الباب وعايز يروح يتخانق مع جلال  
علشان ضايق شيرين... مسكته شيرين بايديها الاتنين من ايده لانه  
كان مندفع وكانت محتاجة توقفه  
"بلاش ياياسر"

"بلاش ايه ده لازم يتهزأ ويتضرب كمان ايه اللي يخليه  
يكلمك فى اى حاجة متخصصوش"

"بلاش علشان خاطرى انا مش عايزة فضايح"

وقف ياسر عند كلمة علشان خاطرى ولف وبص لها

"انا علشان خاطرک راضى بحاجات محدش يرضاها

ابدا...وعلشان خاطرک بتحمل حاجات محدش يتحملها.. وعلشان

خاطرك برضه هسكت بس علشان خاطرى انا لو زودها معاكى تانى

قوليلى"

سكتت شيرين وكانت مستغربة نبرة صوته اللي كأنها طالعة

من القلب ومعرفتتش ترد عليه غير

"حاضر"

"بمناسبة انى لحقتك قبل ماتجرى على الاوضة كالعادة عايز

اقولك حاجة ومنتكسفينيش"

"خير"

"انا طبخت النهاردة وعايذك تاكلى معايا زهقت من الاكل

لوحدى"

ضحكت شيرين وهى بتقوله

"طبخت... ازاي"

”ابدا انتى بس بقالك كتير متكلمتيش معايا وعرفتى انى بقيت

طباخ ولا احسن ست بيت”

مازالت شيرين بتضحك”ازاى وامتى”

”انا بقالى فترة زهقت من اكل السندويتشات فبقيت اتصل

بامى واخذ منها وصفات اكل واكتبه وانفذه.. مرة يشيط مرة يبقي

مالح مرة يبقي دلح لحد ما بقيت زى الست الشاطرة...هعمل ايه

ماهو المضطر بقى لازم يتصرف..المهم هتاكلى معايا ولا آكل الاكل

الحلو ده كله لوحدى”

”ههههههه هاكل معاك”

”يااهلا وسهلا بس اقولك حاجة... ضحككت حلوة احسن من

العقدة اللى بتعقديها على جبينك”

شيرين فجأة وكأنها افتكرت انها لازم تكشر تانى فقلت بؤها

اللى كان مبتسم وعقدت العقدة تانى وغيرت الموضوع

”انا داخله اغير هدومى”

”ماشى بس برضه وحشة العقدة دى والضحكة احلى”

دخلت شيرين اوضتها واول حاجة عملتها بصت فى المراية

لقيت شكلها مكشر صحيح وافتكرت كلامه وضحكت لقيت شكلها

بقى احلى ففضلت انها تحاول لاتكشر ولا تضحك وتبقي عديمة رد

الفعل... وراحت تتعدى معاها

وهما بينتھوا من الاكل

”تسلم ايدك الاكل حلو اوى“

”اول كلمة حلوة تقوليهاالى من يوم ماتعرفنا...شكرا يااستى بس

الاحلى انك اكلتى معايا خليتى للاكل طعم“

تجاهلت كلامه

”على كده بقى طبخت امتى وازاى انت يدوب تيجى تنام“

”ماهو مش كل يوم يعنى كل كام يوم كده لما اطبخ..وانتى

بتعملى ايه“

”ساعات بجيب اكل جاهز او اعمل اى حاجة بسيطة مش

طبخ يعنى“

”انا يدوب اقوم علشان الشغل مش عايضة اى حاجة“

”ميرسى“

”نفسى تتعاملى معايا على انى موجود وبلاش التجاهل ده

وكل واحد فى جنب وبعيد عن التانى“

”معلش كده احسن مالوش لازمة اننا نتعود على وجودنا فى

حياة بعض... لانها فترة وهتعدى وهنساها وكل واحد هيشوف

حياته“

”اللى تشوفيه“

قام ياسر يلبس وهو حاسس ان شيرين قتلت فرحة جواه  
مجرد فرحة بلحظات قليلة شاركته فيها وبضحكة خفيفة شافها  
على وشها كانت مسببale نوع من السعادة والارتياح... بس هو  
غلطان هو السبب انه نسي الاتفاق واتعامل معاها من قلبه مش حذر

\* \* \* \* \*

ما ياسر نزل فضلت شيرين قاعدة تستعيد كل كلمة قالها ياسر  
وكل حركة وكل لفظة وكل ماتفكر كلمة حلوة تضحك بارتياح  
وسعادة وفي نفس الوقت ارتاحت للكلمتين اللى قالتهم فى الاخر  
علشان مش لازم يتعودوا على بعض ويشيلوا الفوارق اللى بينهم  
بالسهولة دى

وافتكرت كلام جلال استاءت منه اوى وقلبت شفتيها قرفا منه  
بس فكرت... يقصد ايه بكلمة الراجل لو حس انه مراته بعيدة عنه  
يبص بره... بس هى مش مراته... لا مراته قدام الناس

يكون جلال شاف حاجة وعايذ يلفت نظرها ليها... هى مالها  
حتى لو بص بره ده يضايقها فى ايه؟؟؟ لا لازم يحترمها ويحترم  
شعورها... وفجأة قامت دخلت اوضته... اغلب الهدوم فى شنط  
وفيه هدوم على الكنبه.. مفيش حاجة غريبة يعنى... لمحت كيس  
على المكتب لوحده بعيد عن هدومه... لفت نظرها وجالها فضول

انها تشوف ايه اللي فى الكيس... راحت فتحت الكيس ...

اتفاجئت... ايه ده؟؟؟ طقم نوم حريمى



## . 15 .

فضلت شيرين واقفة وماسكة الطقم فى ايديها وهى  
مستغربة... ايه اللى جاب ده هنا؟؟ ولين؟؟ وبعدين قالت لنفسها"  
وانا مالى" وسابت الطقم مكانه وخرجت من الاوضة.  
طول الليل مش عارفة تنام وصورة الطقم مش بتروح من بالها  
ياترى جايبه لمين؟ وامتى؟ وفين؟ ياترى يعرف واحدة مثلا طيب  
امتى وهى بترجع تلاقيه وبييجى قبل ماتنزل... ازاي معقول يكون  
فيه واحدة بتجيله هنا... ايه ... ازاي ... معقول  
كانت دى الفكرة المسيطرة عليها والتفسير الوحيد اللى وصلت  
له

الصبح قبل ماتنزل سمعت ياسر داخل خرجت له  
"ياريت متستقبلش ضيوف وانا مش موجودة"  
"ضيوف مين؟؟ صباح الخير الاول"  
"اى ضيوف يكونوا بييجوا وانا مش موجودة "  
"انا محدش بييجلى واصلا ماليش اصحاب غير فى الشغل"  
"اعتقد ان فيه حد كان موجود امبارح والاكل اللى كان معمول  
ده كان حد مهتم بيك عاملهولك"  
"مالك ياشيرين ماتتكلمى بوضوح انا مش فاهم حاجة"

”بتكلم عن صاحبة الطقم اللي ع المكتب “

”اه .. انا جايبه فعلا لواحدة بحبها“

”انت حر المهم مفيش واحدة تدخل هنا ... على الاقل علشان

سمعتنا واحتراما ليا قدام الناس“

قالت جملتها ونزلت بسرعة قبل مايلحق يرد عليها... كانت

متضايقة اوى لما قالها انه بيحب وكانت ماسكة دموعها بالعافية...

دموع مش عارفة سببها ركبت الباص ومسحت دمعتين نزلوا غضب

عنها

فجأة جه جلال ولسه هيقعد جنبها وبيقول

”صباح الخير الجميل ماله“

صرخت فيه

”صباح الزفت على دماغك ياشيخ اوعى من وشى“

قامت بسرعة ونزلت من الباص وقالت للسواق انها مش رايحة

الشغل النهاردة... واول مانزلت اتصلت بمساعدها فى الشغل وقالت

انها مش جاية الشغل لسبب قهرى وقفلت بسرعة

مشيت وهى مش عارفة رايحة فين اهم حاجة متطلعش البيت

... كانت الدموع بتنزل من عينيها غضب عنها وحاولت تسأل

نفسها كل ده ليه؟؟ علشان ياسر بيحب واياه المشكلة ماهو اكيد له

حياته الخاصة مش يمكن كان بيحب من قبل مايشوفها... حتى لو

بعد ما عرفوا بعض ... هي اللي قالت له ان هو حر فى حياته  
والاتفاق اللي بينهم وقت وهينتهى... حست بحد بيشرها من  
ايدها.. اتخضت... التفقت... اتفاجأت

”ياسر... ايه اللي نزلك دلوقتى“

”ايه اللي نزلك من الباص ورايحة فين كده... قلقتيني

عليكى... ايه ده انتى بتعيطى... حد ضايقك؟“

”انت عرفت منين انى نزلت من الباص“

”طيب تعالى نرجع البيت ولا اوصلك الشغل“

”لا مش رايحة الشغل“

”طيب تعالى واحكىلى مالك“

مشوا فى اتجاه البيت”قولى انت الاول ايه اللي نزلك“

”انا كل يوم ببص عليكى من الشباك بعد ما تنزلى وافضل

مستننى لحد ما الباص يمشى“

استغربت وبصت له

”ليه“

”ابدا علشان اطمن عليكى وعلشان محدش يضايقك“

”مالك وعنيكى شكلك معيطة... احكىلى فى ايه“

”مغيث انا بس مخنوقة شوية ماما ومروة وحشونى اوى“

ملقتش حاجة تقولهاله غير كده... كانوا طلوعوا البيت

“على فكرة انتى نزلتى بسرعة وكنت عايز اكمل كلامى  
معاكى”

“انت مش قلت اللى عندك وانا قلت اللى عندى خلاص”  
“لا انا كنت عايز اؤكد لك ان مفيش حد ممكن يبجى هنا  
وخصوصا زى مانتى فاكرة تعالى اوريكى حاجة”  
خدها من ايدها على اوضته وهى مستسلمة وماشية معاه  
“شوفى كده الشنطة دى”

ووراها شنطة فيها هدوم مش كتير كلها حريمى  
“ايه ده”

“دى شنطة قلت هبعثها لياسمين اختى مع سليم زميلى اللى  
مسافر كمان ٣ ايام... ياسمين فرحها كمان اسبوعين وكنت عايز  
اجيب لها شوية هدوم من هنا يعنى هدوم عرايس على هدوم  
للخروج... واتضح انى فاشل نزلت كذا مرة ومجيبتش غير حاجات  
بسيطة وكنت عايز اقولك تنزلى معايا يوم الجمعة بس خفت  
تخرجينى كالعادة فسكتت”  
“انا اخرجك... ليه”

“كل ماتعامل معاكى عادى الايكي بتعاملينى وحش اوى”  
“لا طبعا مقصدش اعاملك وحش”

”انا عايز اطمئنك انا مش ناسى ومش هنسى الاتفاق اللي بيننا  
بس نفسى نتعامل كاننا اخوات على الاقل مش اعداء”  
”لالا اعداء ايه؟... طيب نستغل انى اجازة وادخل نام لحد  
مالمحلات تفتح وننزل مع بعض نجيب احلى هدوم لياسمين”  
”بجد ياشيرين... هتنزلى معايا”

كان ياسر فرحان بمعاملة شيرين وموافقته على النزول معاه  
بس اللي كانت فرحانة اكثر شيرين لانها اتأكدت ان شكوكها مش  
صح

وقعدت تستناه لحد مايصحى وقررت انها تتعامل معاه بشكل  
احسن شوية هو ماضيقيهاش فى حاجة يبقى بلاش تضايقه تانى  
بكلامها البايخ... وخلص هو اكد لها انه مش هينسى الاتفاق...  
وطبعاً هى مش هتنسى يبقى المعاملة الطيبة الودودة مش هتخسر  
بعد كام ساعة صحى ياسر ونزلوا وقضوا يوم مع بعض من  
احلى الايام... زى اول يوم نزلوا فيه مع بعض كان ماسك ايدها  
طول ماهما ماشيين ولو فيه زحمة كان بيخاف عليها كان يحاوطها  
بدراعه من كتفها ويرجع يمسك ايدها تانى... لفوا على محلات  
كتير واشتروا حاجات كتير منها هدوم خروج ومنها لوازم  
للعروسة... واتغدوا بره ورجعوا البيت قبل ميعاد شغل ياسر بساعة

بعد ما ياسر نزل كانت سعيدة اوى كل ماتفتكر حطت ايده  
على كتفها كانت بتحسسها بالامان والحنان والسعادة... قامت  
اتصلت بمامتها وسألتها على طريقة اكل حلو... اخدت الطريقة  
وسهرت تطبخ لأول مرة فى حياتها... والصبح قبل ماتنزل لما قابلت  
ياسر بعد رجوعه من الشغل

"ياسر ياريت متدخلش المطبخ وتطبخ اكلاتك الشهية النهاردة"  
"ليه"

"علشان انا اللي طابخة النهاردة واستناني نتغدى مع بعض"  
كانت مبتسمة وهى بتكلمه على غير العادة... كان ياسر  
فرحان بيها ويمعاملتها اللي بدأت تتحسن ودعها بابتسامة  
وهى بتركب الباص رفعت عينها للشباك لقيت ياسر واقف  
يظمن عليها وشاور لها وشاورت له وركبت واتحرك الباص متجها  
للشغل.

مرت الايام والشهور اللي بعد كده وياسر وشيرين عايشين فى سلام من غير الطوب اللي كانت بتحدفه شيرين فى وش ياسر وكانت الساعات البسيطة اللي بتجمعهم فى البيت احلى اوقات حياتهم هما الاتنين... ولكن من غير ما حد فيهم يقول شعوره ده للتانى... وكمان محدش فيهم صرح نفسه بحقيقة شعوره او ربما تجاهلوا احساسهم ده واتحط فى اطار التعود او الاحتياج لوجود صديق فى الغربية... فاعتبروا نفسهم صديقين

كانت الاجازة قريت وكان فاضل اسبوع تقريبا ويرجعوا مصر فى اجازتهم السنوية... وبعد ما نزل ياسر كالعادة الساعة ٨ الاربع بالليل بعدها بتقعد شيرين شوية تتفرج على التليفزيون او تحضر لاكل تانى يوم وحوالى الساعة ١١ بتدخل تنام

وهى نايمه سمعت صوت خبط على الباب... كانت فى الاول مش عارفة الساعة كام؟؟ لما بصت فى الساعة لقيتها ١٢ ونص بالليل... استغربت لانها مش متعودة ان حد يزورهم فى الوقت ده... مش متعودة ان حد يزورهم اصلا... قامت تشوف مين وهى بتتسائل ياترى مين اللي ممكن يبجى دلوقتى

فتحت الباب لقيت جيهان مرات جلال والطفلتين وشنطة

سفر

هى شافت جيهان خلال السنة اللى فاتت دى مرتين تلاتة  
مش اكثر وعلاقتها بيها تكاد تكون معدومة لانها مرات جلال  
وجلال طبعا مجرد سيرته بتثير اعصاب شيرين وياسر... جيهان  
شكلها معيطة .. فاستغربت شيرين

”ايه ده مالك؟ انتى كويسة وبناتك كويسين“

جيهان وهى بتعيط”احنا كويسين بس ممكن ابات عندك الليلة

وامشى الصبح على طول“

”اه طبعا اتفضلى ... بس طمنينى مالك“

دخلت جيهان وقعدت فى اقرب مكان للباب وكانت شايلة

بننت وماسكة الثانية فى ايدها ودخلت الشنطة اللى معاها

وبعد ماعملت لها شيرين عصير ليمون

”اشربى ده واهدى وقوليلى مالك“

”انا مش عارفة اشكرك ازاي انك استضفتينى... بس انا

معرفتش اروح فين بالليل كده.. وانتى المصرية الوحيدة فى العمارة

وعارفة ان جوزك فى الشغل فقلت لو ما يضايقكيش استنى عندك

لحد الصبح قبل ما اروح المطار وارجع مصر على اول طائرة“



”اهلا وسهلا بس ايه اللي خلاكى عايزة ترجعى بالسرعة دى  
... انتى متخانقة مع جلال“

زاد بكائها وبالتالي بكاء الطفلتين وكل واحدة ماسكة فى جزء  
من هدم مامتها... اخدت شيرين بنت وقعدتها جنبها وطبطبت  
عليها واخذت جيهان البنت الثانية وقعدت تططب عليها لحد  
مالبنات سكتوا وكملت جيهان

”جلال من يوم ماخلفت من سنة ونص وهو اتغير بقى مش  
طايقنى ولا طايق البنات ولا بيقعد فى البيت ساعة على بعض حتى  
لو نايم والبنات عيطوا يقوم يزعق ويبهدلنى وانا ساكتة... مش  
حاسس انا قد ايه تعبانة معاهم انا مبنامش ساعتين على بعض لو  
واحدة نامت الثانية بتبقى صاحية ولو شايلة واحدة الثانية بتعيط انا  
تعبت جدا وهو حتى مش بيقولى كلمة حلوة تخفف عنى بل بالعكس  
بيتهمنى بالاهمال وكأنى اجرمت انى خلفت توأم... هو بإيدى؟؟  
كل ده وكنت ساكتة... انما بقى علاقته وغرامياته دى اللي فاقت  
التحمل انا عارفة ان الناس بيتجنبونى بسبب بجاحته وقلة ذوقه...  
خلاص مش قادرة اتحمل اكثر من كده“

كانت شيرين بتسمع لها ومتأثرة جدا بحالها ولما خلصت  
الحكاية كانوا البنات ناموا

”طيب قومى ارتاحى ونيمى البنات والصبح رباح“

دخلتها فى اوضتها علشان السرير كبير وتقدر تنام هى وبناتها

فيه

ودخلت تنام فى اوضة ياسر... اول مرة تنام على سريريه ...  
قبل ماتنام كانت بتلمس مكانه وكانها بتلمسه واول ما حطت راسها  
على المخدة بتاعته كانت حاسة وكانها فى حضنه فاستسلمت  
لاحساسها وغمضت عينيها ونامت... صحيت فجأة على صوت  
خبط على الباب... هى مش عارفة فات وقت قد ايه؟؟ بتبص فى  
الساعة لقيتها ٥ الصبح هو احياننا ياسر ببيجي الوقت ده بس مش  
بيخبط... قامت تشوف قابلتها جيهان على باب الاوضة

"لو جلال اوعى تقولى انى هنا... ارجوكى"

"حاضر... متخافيش... اقللى عليكى الاوضة"

فتحت وفعلا كان جلال وكان مرتبك وبصوت مخنوق

"انا اسف يامدام شيرين بس مشفتيش جيهان والبنات"

"لا... حصل حاجة"

"انا رجعت ملقيتهمش وهى متعرفش حد هنا خالص وروحت

المطار دورت عليها ملقيتهاش واول طيارة لمصر طالعة العصر انا

هموت من القلق عليهم... انا مش عارف اعمل ايه ابغ البوليس ولا

اعمل ايه؟؟ عموما انا اسف لازعاجك وهسأل عند كل الجيران

ويارب الاقيها كويسة هى والعيال"

”رَبنا يَطْمَنُكَ“

قفلت شيرين الباب ودخلت لجيهان

”على فكرة جلال هيتجنن عليكى... انا عايزة اقولك انى مش

برتاحله... بس صعب عليا اوى... انتى مش بتحبيه؟“

”جلال مكنش كده ده احنا قصة حب كبيرة وعلشان كده

كنت بتحملة.. بس زى ماحكيت لك تعبت اوى منه“

”انتى صارحتيه بكلامك ده وبعيوبه قبل كده“

”لا“

”طيب ممكن اقولك اديله فرصة واتصارحوا واتكلموا وان

متغيرش يبقى انتى قرارك صح واعملى اللى انتى عايزاه“

سكتت جيهان وكان ردها كله دموع.. ففهمت شيرين انها

لسه بتحبه

”انا هقوم اندهله وتتكلموا وتصفوا اموركم“

قامت شيرين وكان عمال يسأل عند الجيران شقة شقة زى

المجنون

”تعالى يا جلال اطمن جيهان والبنات عندى ... جيهان عايزة

تقولك كلمتين ياريت تسمعهم وتفهمهم كويس“

سابتهم قاعدين مع بعض ودخلت قعدت مع البنات لانهم

كانوا صاحيين... وبعد نص ساعة دخلتلها جيهان

“انا اتكلمت معاه وقلت له كل اللي كان جوايا وبان عليه  
الندم وقالى هو عرف قيمتنا وقد ايه بيحبنا لما ملقناش موجودين...  
انا مش عارفة اشكرك ازاي انتى انقذتى بيتى من الخراب...ربنا  
يكرمك يارب ويرزقكم بالذرية الصالحة”

سلمت عليها جيهان وباستها وخذت البنات وشنطتها

وراحت

كانت سعيدة جدا انها صالحتهم وحست انها عملت حاجة  
كبيرة وحلوة اوى... ياه ده الحب حلو اوى حتى بمشاكله ...  
وفكرت فى الدعوة اللى دعته جيهان... الذرية الصالحة... ياترى  
هيجى اليوم اللى تتجوز وتخلف... وياسلام لو اتجوزت واحد  
طيب وحنين زى ياسر... وحد زيه ليه..ماهى فعلا متجوزة ياسر...  
وياترى احساسها ناحيته ده ايه؟؟ اخوة... صداقة... حب!!!!

معقول تكون بتحب ياسر رغم كل الفروق...لالالا مش معقول

طبعا

حاولت تنام بس ملحقتش قامت وبدأت تلبس وتستعد  
للنزول... قبل ماتنزل بشوية الباب خبط...ميعاد رجوع  
ياسر..طيب ليه مفتحش

راحت تفتح الباب لقيت جلال

“انا استغليت ان جيهان نايمه وقلت اجى اشرك على  
استضافتك... واللييلة اللي غيرت حياتى انا مش لاقى كلام اقولهولك  
يعبر لك عن احساسى... متشكر جدا”  
“بتشكرنى على ايه بس... انا اللي سعيدة جدا بالحب اللي  
شفته وبارب يفضل الحب ده موجود طول العمر”  
كان ياسر طالع على السلم فى اللحظة اللي فتحت فيها  
شيرين الباب لجلال ووقف يسمع الحوار اللي دار بينهم... وكان  
مصدوم من اللي سمعه ومش مصدق ودانه... معقول فيه علاقة بين  
جلال وشيرين!!

قفلت شيرين الباب بعد ماخلصت كلام مع جلال... بصت  
فى الساعة كانت ٨ وتلت يعنى ياسر اتأخر ٥ دقائق... راحت  
تكمل اللمسات الاخيرة فى لبسها وسمعت صوت ياسر داخل من  
الباب ظبطت نفسها بسرعة وراحت تستقبله بابتسامة وتحية قبل  
مانزل زى كل يوم

"صباح الخير ياياسر"

رد عليها وهو مكشر "صباح النور"

"انا محضرة الاكل ولما اجى نبقى نتغدى مع بعض"

"لا انا نازل بدرى النهاردة مش هتغدى فى البيت"

"ليه؟ مالك شكلك متضايق؟"

رد عليها بعصبية "ايوه متضايق منك"

"انا مش قلتك متتعاملش مع الوقح ده"

"قصدك مين؟"

"هو فيه غيره جلال البجح ولا دلوقتى مبقاش وقح ولا بجح"

"اه فعلا كان ذوق ومعملش حاجة تضايقنى"

”طبعا معملش حاجة تضايقك واضح ان كل حاجة كانت

برضاكى ”

”انت تقصد ايه؟ وضح كلامك”

كان صوته اعلى ومسكها من دراعها

”الشكر اللى كان بيشكرهولك على الاستضافة والسعادة اللى

انتى فيها”

”انت سمعت؟ وفهمت ايه بس...انت ماسكنى كده

ليه...سيب دراعى”

قبل ماتكمل كلامها وتحكيه عن الليلة اللى فاتت

”اسمعى لما اقولك زى مابحترمك تحترمينى وانتى حرة فى

حياتك تعرفى ده تعرفى ده براحتك بس بعد ماتفاقنا يخلص

وننهى الوضع السخيف ده... انما طول ماانتى على ذمتى متكلميش

اى راجل انا قلتلك متكلميش معاه... فاهمة”

خلص كلامه وزقها ودخل على اوضته ... كانت مصدومة من

طريقته وكلامه وسوء ظنه فيها... ازاي يظن كده؟؟ وازاي يمسخها

ويزقها كده... كل ده كوم وبيتمنى الاتفاق يخلص وبيقول عليه

وضع سخيف... للدرجة دى مش طايقها ولا طايق عيشتهم مع

بعض... راح فين الحنان والذوق والمعاملة الرقيقة... نزلت قبل ما

تتأخر على ميعاد الباص... اول ما وصلت الشغل دخلت للمدير

العام وسألته هل ممكن تقديم معاد الاجازة اسبوع... فقالها اهم حاجة انها تكون متفقة مع مساعدينها ومرتبة شغلها وتبقى ترجع الاسبوع بدرى... بعد مقابلتها للمدير قررت انها تلحق الطائرة وزى ماقال جلال ان فيه طيارة الساعة ٤ العصر... راحت مكتبها وخلصت بسرعة شغل وراها واتفقت مع مساعدينها... وراحت على البيت

دخلت البيت وقلت الباب وراها بشويش علشان ياسر ميحسش بيها وهو نايم وراحت على اوضتها علشان تلم الهدوم فى الشنط... وهى بتحط هدومها فى الشنط لقيت ياسر واقف على باب الاوضة

"ايه ده؟؟ انتى بتعملى ايه؟ ورايحة فين؟"

مردتش عليه وكملت اللي بتعمله وقلت الشنط وراحت على الباب... كل ده وهو بيسالها رايحة فين؟ ومش بترد عليه... لما راحت ناحية الباب وقف قدامها

"انتى غلطانة وكمان ليكى عين تزعلى... استنى هنا ومفيش

نزول من غير ماعرف انتى رايحة فين"

لما حست انها فعلا مستحيل تنزل

"انا قدمت الاجازة اسبوع ونازلة مصر دلوقتى"





”لا خالص مفيش اى حاجة“

بقت الايام تعدى يوم ورا التانى وكل شوية شيرين يزيد  
اشتياقها لياسر ولما تحب تفرح كانت تفتكر كلامه حركاته حتى  
الاكل اللى كان بيعمله كانت تعمله علشان بس تفتكر ياسر... بس  
اللى كان قاتلها كلامه الاخير وطريقة معاملته ليها... والاكثر من  
كده تسميته للى بينهم بالوضع السخيف... كانت مش عارفة  
الشهرين الاجازة هيعدوا عليها ازاي... ولما ترجع وتتعامل معاه  
تانى... هيتعاملوا مع بعض ازاي؟؟... مش مهم المهم ترجع وتشوفه  
كل يوم زى الأول

\*\*\*\*\*

بعد ياسر مارجع لبيته ولاهله استقبلوه بحب واشتياق كبير  
وكانت ياسمين على وش ولادة... وكان ابوه بيدعيه علشان  
بيساعدهم وشال عنه هم ثقيل وهو مصاريف جواز ياسمين ومصاريف  
البيت

كانت الايام بتعدى وهو متضايق اوى ان شيرين مش بتبادله  
احساسه بيها... هو مش عارف احساسه ده بدأ امتى المهم ان  
النتيجة واحدة... واتأكد لما بدأت الاجازة انه فعلا بيحبها رغم كل  
الفروق اللى بينهم بيحبها... بس للاسف هى مش بتبادله نفس

الاحساس والاكثر من كده انها على علاقة بواحد تانى...واحد  
متجوز.. وياترى حدود العلاقة دي ايه؟؟ ولا ناويين على ايه؟؟  
كان تفكيره ده بيقترله وبعد اسبوع من رجوعه قعدت مامته  
معاه

"هو انا مش هفرح بيك ياياسر"

"ان شاءالله ياماما كل شئ بأوان"

"انا نفسى يابنى افرح بيك زى مافرحننا باختك... ايه رأيك

فى منال"

"منال مين"

"منال اللى فى العمارة اللى قدامنا... بنت طيبة وغلبانة ومن  
يوم ماابوها وامها اتطلقوا وهى عندها ٥ سنين وامها اتجوزت وابوها  
اخدها ومراته بتعاملها معاملة وحشة اوى وكله قدام عنينا يابنى دى  
مبهدلاها اخر بهدلة وعاملها ولا الخدمة وحتى مقيش كلمة حلوة  
ولا هدمة كويسة وكانت مصممة ان البننت متكملش بعد الثانوية لولا  
الناس والجيران كلموا ابوها وضغطوا عليه علشان تكمل تعليمها"

"هى فى كلية مش كده؟"

"اه فى كلية بس يا حبة عينى ولابتخليها تروح علشان تفضل  
تخدمها وتخدم ولادها... ينوبك فيها ثواب تخلصها من الهم اللى  
هيا فيه... وعلى ضمانتى البننت مؤدبة ومنكسرة ومش هتلاقى زيها"

”مش عارف ياماما... انتى بتقولى فى كلية وانا...“  
”انت ايه انت راجل ولا فيه حاجة تعيبك ابدأ...اروح اكلم  
ابوها واشوف“

”سيبىنى كام يوم افكر“

”طيب يا حبيبي اللي تشوفه... ويارب تكون من نصيبك“  
وقعد ياسر يفكر وكل تفكيره فى شيرين بس لما يفكر اللي  
حصل اخر يوم والفروق اللي بينهم اللي دايمًا كانت بتفكره بيها  
عرف ان حبه ليها او حبها ليه مستحيل  
واخذ قراره وراح لمامته

”ماما روى كلميهم ولو وافقوا حددى معاهم معاد قرابة

الفاحة“

## . 18 .

بعد ماياسر قال لمامته انه موافق انها تطلب ايد منال... فعلا  
تانى يوم ندهت منال وهى رايحة السوق ومكنش ياسر فى البيت  
"تعالى يامنال عايزاكى... انتى كنتى رايحة فين"  
"كنت رايحة السوق ياطنط مش عايزة حاجة اجيبهالك معايا"  
"لا يا حبيبتى ربنا يخليكى... انتى عاملة ايه فى كليتك"  
"اهو الحمد لله هانت فاضل سنة"  
"ومرات ابوكى عاملة معاكى ايه؟"  
"زى ماهى انا بحاول مخليهاش تمسك عليا اى غلطة علشان  
الحياة تمشى من غير خناقات ونكد"  
"احنا عايزين نيحى نخطبك لياسر بس قلت اسالك الاول قبل  
مانكلم ابوكى"  
ظهرت على منال الفرحة المزوجة بالكسوف ومردتش وطبعاً  
ام ياسر فهمت ومرضيتش تخرجها  
"ها يا منال نيحى ولا بلاش"  
"تنوروا ياطنط بس تفتكرى طنط عايدة هتوافق"  
"احنا مالنا بيها لو انتى موافقة ملكيش دعوة"  
ضحكت منال "اقوم انا علشان متأخرش"

”طيب يا حبيبتي ولا كأنك تعرفي حاجة علشان متمسكهاش

عليكي ”

”حاضر ياطنط“

فى نفس اليوم بالليل كانت ام ياسر اتفقت مع ابو ياسر انه  
يقابل ابو منال فى القهوة ويكلمه ويحاول ياخذ منه كلمة ويحددوا  
معاد الزيارة قبل مايروح وياخذ راى مراته وممكن تاثر عليه وتخليه  
يرفض

وفعلا اللي حصل انه قابله واخذ منه موافقة مبدئية ومعاد  
للزيارة علشان مراته تكون امام الامر الواقع... وفى الزيارة لقوها  
بتتعامل معاهم بكل ذوق وفرحانة وبين كل كلمة والثانية

”منال دى بنتى وانا نفسى افرح بيها“

وقرأوا الفاتحة وحددوا معاد يجيوا فيه الشبكة... واتفقوا ان

الجواز يكون بعد انتهاء عقد ياسر

كان ياسر بيحاول يكون سعيد وخصوصا ان كل اللي حواليه  
سعداء... وخصوصا منال كانت فعلا مفيهاش غلطة عاقلة ومؤدبة  
وجميلة وكل حاجة ممكن يتمناها... بس مكنش فرحان بيها وكان  
دايما بيفكر فى شيرين حتى كلامها وردودها العدوانية كان بيفتكرها  
ويعيش معاه فى احلام نومه ويقظته... ويوم جه تليفون من حسن  
وقاله ان ياسمين بتولد وهياخدها ع المستشفى وعايزه يجيب مامته

ويقابلهم هناك ... وفعلا لما وصلوا كانت ياسمين فى العمليات وبعد

شوية سمعوا صوت صراخ النونو... طلعت الممرضة بالطفل

"مبروك جابت بنت... حمدالله على سلامتھا"

بعد خروج ياسمين من العمليات وبعد مافات

"عايزة اشوف البنث"

الام"اهى يا حبيبتي زى القمر شبهك وشبه ابوها...ربنا

يخليها الكوا"

حسن"تسميها ايه يا ياسمين"

ياسمين"مش عارفة.. شوف انت اسم يكون حلو"

رد ياسر بسرعة"ايه رأيكوا تسموها شيرين"

ياسمين"حلو ايه رأيك يا حسن"

حسن"حلو اوى علشان يبقى فى البيت ياسمين وشيرين"

الام"مبروك يا ابو شيرين وتترى فى عزك"

فرح ياسر بالاسم اللى اختاره... بس مش علشان اختاره.. لا

علشان شيرين هيفضل يقول اسمها طول العمر... قرب لشيرين

الصغيرة وشالها وخدها فى حضنه وباسها بكل حب وحنان

\* \* \* \* \*

مرت الاسبوع وشيرين متضايقه ونفسها الاجازة تخلص

بسرعة علشان تشوف ياسر... كانت بتفكر تتصل بيه بس كانت

كرامتها بتمنعها فى اخر لحظة... وقررت انها المفروض تحاول تنفع  
نفسها انها متستسلمش ل احساسها بيه... بس كانت بتشتاقله  
اكثر... لحد ما الاجازة قربت تخلص ففرحت اكثر مع انها المفروض  
هتسافر ويكون لسه على اجازته اسبوع اللى نزلته قبله ومكنتش  
عارفة هتقضى الاسبوع ده فى البيت لوحدها إزاي.

\* \* \* \* \*

كان ياسر مستنى الاجازة تخلص بفارغ الصبر لاشتياقه  
لشيرين ولما كان فاضل اسبوع قرر يكلمها علشان يتفقوا ويسافروا مع  
بعض... وهو فى الحقيقة كان بيدور على حجة يكلمها بيها... كان  
كل يوم يؤجل المكالمة لانه خايف رد فعلها يضايقه... وقبل ميعاد  
السفر بـ٤ ايام اتصل بيها وكان قلبه هينط من صدره وهو إزاي.

\* \* \* \* \*

كان ياسر مستنى الاجازة تخلص بفارغ الصبر لاشتياقه  
لشيرين ولما كان فاضل اسبوع قرر يكلمها علشان يتفقوا ويسافروا مع  
بعض... وهو فى الحقيقة كان بيدور على حجة يكلمها بيها... كان  
كل يوم يؤجل المكالمة لانه خايف رد فعلها يضايقه... وقبل ميعاد  
السفر بـ٤ ايام اتصل بيها وكان قلبه هينط من صدره وهو بيطلبها

\* \* \* \* \*



كانت شيرين قاعدة كعادتها بتفكر فى ياسر وفجأة رن الموبايل  
ولما بصت كان قلبها هيقف من المفاجأة لما لقيت رقم ياسر  
وبدقات قلبها اللي حست انها اعلى من صوتها"الو"  
"الو ... ازيك يا شيرين"  
"الحمد لله انت عامل ايه"  
"كويس الحمد لله... بقولك هترجعى معايا ولا لوحديكى زى  
ماجيتى"

"اكيد لوحديكى مش انت اجازتك لسه عليها ١٠ ايام"  
"لا انا نزلت وراكى فى نفس اليوم بس ملحقتش الطائرة"  
فرحت شيرين لما قالها كده وانه حاول يراضيهها  
"كنت عايز تلحقنى بجد؟؟؟"

"ايوه علشان هنقول ايه لزاميلنا ..هنقول كل واحد نزل اجازة  
لوحده ليه"  
"يعنى علشان زمايلنا بس"  
"نبيقى نتكلم بعدين... المهم هنسافر مع بعض ولا لأ"  
"او ك هنتقابل فى المطار"

”لا هعدى عليكى بتاكسى زى المرة اللى فاتت ...هأكد الحجز

وابقى اكلمك واقولك تجهزى امتى بالظبط”

عدت الايام اللى بعد كده كأنها شهور لحد المعاد اللى اتفقوا

عليه... ولما نزلت شيرين من العمارة اخذ منها الشنط وحطها فى

العربية وسلم عليها واخذ راسها بين ايديه وباسها وهو بيقولها

بهمسات

”وحشتينى”

استسلمت شيرين وراسها بين ايدين ياسر لكنها كانت ثوانى  
قليلة وفتح لها التاكسى وركبها ورا وركب هو جنب السواق  
طول الطريق وشيرين كل نظراتها مركزة على ياسر وكأنها  
بتحضنه بعنيها... اما ياسر فكان سعيد جدا باجتماعه مع شيرين  
فى مكان واحد حتى لو كان التاكسى بس هو فعلا كان مشتاق لها  
قطع صوت رنة موبايل ياسر افكار الاتنين... ورد  
"ايوه يامنال... لا لسه موصلتش المطار.. حاضر هكلمك قبل  
ماقفل التليفون واول ماوصل ان شاءالله... متقلقيش... محمد رسول  
الله"

احتارت شيرين فى تفسير المكالمة بعد استغرابها... ياترى مين  
منال هى عارفة ان اخته الوحيدة اسمها ياسمين... مين  
منال...قريبته؟؟ حتى لو قريبته ليه عايزاه يكلمها كل ده وتقفل  
مكالمتها بالطريقة دى؟؟؟ قررت شيرين انها تسأله اول ماتيجى  
فرصة

بعد ما تحركت الطائرة بشوية سألته شيرين

”مين منال اللي كلمتك واحنا فى التاكسى وياترى كلمتها ولا

لا”

”ياخبر انا فعلا نسيت اكلمها قبل ما اقل التليفون”

”مين دى يياسر”

”خطيبتى”

كانت الكلمة وكأنها سكينه طعننها بيها ياسر فى قلبها...  
عايزة تصرخ وتقول له ليه خطبت وانا مراتك .. بس بأى حق تقوله  
وهى دايمه كانت بتفكره ان اللى بينهم مجرد اتفاق وهيخلص...  
واخر يوم هو قالها انه مستنى نهاية الاتفاق والوضع السخيف... قد  
كده بيتعامل معاها وهو مش طايقها... بس معاملته الرقيقه دى  
كانت ايه؟؟ تمثيل ..معقول هو ممثل قدير بالشكل ده وقادر يتلون  
باكثر من لون... ياااااه معقول ياسر الملاك يطلع شيطان متعدد  
الاشكال والوجوه ... بعد مارد عليها سكتت خالص ومقدرتش تتكلم  
ولا كلمة

\*\*\*\*\*

ياسر كان بيتمنى انها تقوله ليه عمل كده كان مستعد ولو  
قالت له او حتى لمحت له انها بتحبه زى ما بيحبها انه يسبب

منال ويسيب الدنيا كلها علشانها وعلشان يفضل جنبها طول العمر

... بس اكيد بيحلم هو نسى اللي سمعه بودانه اخر يوم!!!!!!

سألها يمكن ترد عليه بكلمة تديله امل

”مالك يا شيرين... فيه حاجة ضايقتك“

ومسكت نفسها قبل صوتها المخنوق ما يفضحها

”وانا ازعل ليه... كل واحد فينا حر في حياته واهى فترة

وهتعدى وهنخرج من حياة بعض للأبد“

كلامها رغم انه كان متوقع الا انه اتصدم... كان يتمنى يسمع

منها كلام تانى خالص... بس هو ليه بييجرى ورا احساس

مستحيل... لازم يحاول يحب منال زى ماواضح انها بتحبه ويكون

كل تفكيره واحساسه مع منال مش شيرين اللي مش حاسه بيه

خالص

\* \* \* \* \*

شيرين حست ان كلامها كان رد لكرامتها اولاً لسوء ظنه فيها

لما اعتقد عنها على علاقة بجلال ثانياً لانه مش حاسس بيها خالص

\* \* \* \* \*

لحد ما وصلوا البيت وهما محدش فيهم بيتكلم مع التانى الا

فى الضرورة وكان لسه يوم واحد بس ويبدأوا شغل... طبعا العلاقة

كانت شبه مقطوعة وكان كل واحد عايش لوحده... وباسر اتجه

لمنال كل شوية كلام فى التليفون ولما تسمعه شيرين وتعرف انه بيكلم  
منال تقيد فيها نار الغيرة

\* \* \* \* \*

بعد حوالى شهر من رجوعهم والمعاملة بينهم زى ماهى فى  
اضيق الحدود ويوم قبل ماينزل يروح شغله سمع الباب بيخبط  
وشيرين راحت تفتح

”اهلا ازيك يا جيهان اتفضلى“

”ازيك يا شيرين عاملة ايه“

”الحمد لله بخير... انتى فىن؟؟ وجلال مش بشوفه“

”احنا لسه راجعين من الاجازة النهاردة وعرفت ان تانى يوم  
كنت عندك انك نزلتى اجازة... انا عايزة اقولك ان من اليوم اللى  
استقبلتيني فيه انا وولادى عندك وجلال اتغير خالص وبقى كويس  
معايا جدا وبقى حاسس بيه وبتعبى مع البنات وبيساعدنى فيهم  
على قد مايقدر... كل ده بفضلك انك خليتيني عندك لحد ماهدا  
وانا لو كنت اخدت قرار الانفصال كنت اكيد هندم كتير اوى“

”الحمد لله بس انا معملتش حاجة انا حسيت انك بتحببته وهو  
كان هيتجنن من غيركوا وكل اللى عملته انى قعدتكووا تتكلموا مع  
بعض انما انتوا اللى حليتوا مشاكلكم بنفسكم“

”انتى متعرفيش غلاوتك عندى ونفسى نردلك جميلك ده“

”ولا جميل ولا حاجة ربنا يسعدكوا

\* \* \* \* \*

ياسر كان سامع كل الكلام اللي دار ومش فاهم حاجة؟؟ هو  
مين اللي كان عندها اخر يوم جلال ولا مراته ... لما سمع صوت  
الباب بيتقفل خرج من اوضته وسأل شيرين عن تفسير اللي سمعه  
وحكت له شيرين عن كل تفاصيل الليلة اللي قبل السفر...  
وقتها فهم انه فسر كلام جلال غلط.. جلال كان يبشكرها على  
استضافتها لمراته مش له هو... حس بمرارة الندم ومعرفش يعمل  
ايه؟؟ يعتذر ولا يطلب انها تسامحه... كان معاد نزول ياسر فاضطر  
ينزل من غير مايلق خالص على الحكاية اللي حكيتها شيرين

\* \* \* \* \*

أثناء ماكان ياسر فى الشغل كان كل تفكيره انه ظلم شيرين  
وبقى يتساءل ياترى هل اتسرع فى خطوبته لمنال؟؟ بس مش معنى  
انه ظلم شيرين انها بتحبه... هى عمرها ما لمحت بكده ولا شاف  
منها اللي يحسسه انها بتحبه... يبقى هو اكيد مش غلطان  
بخطوبته لمنال وقطع تفكيره لما زميله قاله ”الدور عليك النهاردة يا  
ياسر”

\* \* \* \* \*





كانت شيرين على الارض ويتحاول تكلم ياسر ومش حاسة باى حاجة حواليتها... مش حاسة ان الجيران سمعوا صوت الصراخ ومسكوا الحرامى وان جلال طلب الاسعاف لياسر... كل اللى كانت شايفاه وحاسة بيه ان ياسر مش بيرد عليها ومش بيتحرك ودمه سايح ع الارض... كانت دموعها شلالات لما حست ان ياسر راح ... مات...لالالا...ازاى هتعيش من غيره... مش ممكن تقدر تعيش من غيره...وصل الاسعاف واخذ ياسر وهى راحت معاه وجلال معاهم ودخل على العمليات... فيه حالة هرج ومرج ... والدكاترة داخله طالعة... وجلال بيحاول يهديها ويطمئنها... وسمعت الدكتور بيجاوب على جلال لما سأله "الحالة خطيرة"... كانت حاسة انها فى غير وعيها... ياريتيه ماكان وصل فى اللحظة دى كانت بتتمنى انها كانت تموت ولا يحصله حاجة ولا ينجرح جرح بسيط... خرج الدكتور وقال

"المريض نرف كثير ومحتاج نقل دم"

طبعا شيرين ردت انهم ياخدوا منها وبعد التحاليل كانت فصيلة دمها مختلفة ولا تصلح فاتبرع جلال وكانت الفصيلة متوافقة

وفعلا اتبرع جلال بدمه لياسر وبعد ساعات طويلة فى العمليات  
خرج ياسر للعناية المركزة ... ولما سألت الدكتور جاوبها  
"لحد بالليل هيكون فى العناية المركزة وممنوع تواجد اى حد  
بعد كده ممكن ننقله غرفة عادية لو الحالة مستقرة"

"بس انا مش هسيبيه"

"ممنوع... ممكن تيجى بالليل لو حالته استقرت وانتقل غرفة  
عادية ممكن نسمحك بمرافقتة"

قبل ماترد جلال قالها

"تعالى نمشى دلوقتى حتى ترتاحى وتغيرى هدومك اللى فيها  
دم وتشوفى لو محتاجة حاجة وانا اجيبك بالليل"

وافقت ومشيت مع جلال بعد ماشافت ياسر وهو فاقد الوعى  
من اثر البنج مشيت انما كان قلبها وعقلها مع ياسر

لما دخلت البيت وكنا وصلنا لبعده الظهر كان قلبها مقبوض  
وخصوصا لما شافت اوضتها والدم اللى مغرقها... وفجأة لقيت  
موبايل بيرن... ده موبايل ياسر.. اكيد وقع منه وقت الخناقة مسكت  
التليفون... لقيت المتصل منال... قعدت تبص للتليفون ودموعها  
بتنزله ومش عارفة تتصرف... قالت لنفسها يارب بس يقوم بالسلامة  
ومش مهم اى حاجة تانية حتى لو بيعحب واحدة تانية... مش مهم  
المهم يقوم بالسلامة ويرجع تانى زى الاول... بعد الاتصال مافصل

بصت لقيت ٦ ميسد كول... بعدها بلحظات جت رسالة ...  
فتحتها وكانت من منال" حبيبي انت فين.. مش بترد ليه...  
ومكلمتنيش ليه الصبح زى كل يوم... رد ومتقلقنيش عليك"  
المكاملة خليتها متضايقة اكثر واكثر... بيكلمها كل يوم وعابش  
حياته معاها عادى وبتقوله يا حبيبي... للدرجة دى مش حاسس  
بيها... طلعت قعدت بره الاوضة وهى بتفكر يعنى هى مراته ومفيش  
مرة قدرت تقوله يا حبيبي رغم انها لو قالتها هتكون طالعة من  
قلبها... وخطيبته بتعامل معاها كده... اكيد بيبادلها الحب... بعد  
شوية التليفون رن ... بس المرة دى كان المتصل ياسمين... مرة  
واتنين وتلاتة لحد ما فصل... فكرت ترد بس هتقول ايه؟؟ مقدرتش  
ترد لانها معندهاش رد وجت رسالة تانية بس من ياسمين  
"ياسر انت كويس؟ ماما ومنال قلقانين وكده انا كمان قلقت  
عليك اوى... طمنا بسرعة"

بعد الرسالة دى فكرت شيرين تعمل ايه هيفضلوا يتصلوا كل  
شوية حتى لو قفلت التليفون حرام مامته تقلق مش مهم حد تانى  
المهم مامته... فكرت ومسكت التليفون وكتبت "انا بخير اطمنوا  
التليفون بايظ وانا هوديه يتصلح لو ما اتصلتش كام يوم متقلقوش اول  
ما يتصلح هكلمكم" وبعثت الرسالة على رقم ياسمين وقفلت التليفون  
بعدها... حتى لو هيقلقوا شوية بس ارحم ما يعرفوا اللي حصل

بعد شوية لقيت الباب بيخبط

”جيهان تعالى اتفضلى“

”انتى عاملة ايه دلوقتى“

”الحمد لله بس اهم حاجة ياسر يقوم بالسلامة“

”ان شاء الله ربنا يطمئنك عليه... خدى اتغدى اكيد معملتيش

اكل ولا اكلتى من الصبح“

”لا ميرسى مليش نفس والله... واعمل ايه انا مش عارفة اعمل

حاجة خالص حتى الاوضة كلها دم ومش عارفة انضفها“

”بصى انا اعرف واحدة بتنضف هتصل بيها وابعتها لك قبل

ماتنزلى“

”ميرسى يا جيهان انا مش عارفة من غيركوا كنت عملت ايه“

وبالليل بعد ما الست خلصت تنضيف راحت شيرين المستشفى

وهى ايدها على قلبها... وعرفت انه اتنقل غرفة عادية... اول

مادخلت وشافته نايم ومتعلق له المحاليل ومحطوط اجهزة على

صدره مقدرتش تمسك نفسها وجريت عليه مسكت ايده وباستها

وهى بتعيط قعدت جنبه وعنيها عليه... اول مرة تقدر تبص له

كثير... يااااه قد كده بتحبه... وكانت نفسها يفوق ويكلمها ولما

سألت هو ليه نايم عرفت انه اخذ منوم فى المحاليل علشان

ميحسش بالالام... وبعد يومين وهى قاعدة وماسكة ايده اللي

ماسبتهاش خالص... حسبت بايده بتتحرك وبدأ يفتح عينيه واول

حاجة نطقها

"شيرين"

انتفضت شيرين من مكانها وهى فى قمة السعادة

"ياسر انت كويس؟؟"

"الحمدلله.. حصل ايه"

"لما وصلت البيت ولقيت الحرامى..."

"اه افكرت انتى حصلك حاجة"

"لا انا كويسة المهم انت"

بدأ ياسر فى التحسن التدريجى فى الايام اللى بعد كده وكانوا

قريبين من بعض اوى فى الفترة دى... كانت قاعدة معاه مش

بتسييه خالص بتسنده وتأكله وتسقيه لحد الدكتور ماكتب له خروج

بس كان لسه محتاج رعاية فكانت دايما قاعدة جنبه تديله علاجه

تسنده وهو ماشى فى البيت تعدله المخدة قبل ماينام... كل ده وهى

فى منتهى السعادة انه بيتحسن وانها جنبه طول الوقت... وبعد

ماشى تماما دخل لها اوضتها وكانت لسه بتصحى من النوم...

وقعد على طرف سريرها واخذ ايديها بين ايديه

"صباح الخير"

اتحرجت شيرين واتفاجئت من الموقف واتعدلت فى قعدتها  
وهى بتعدل شعرها وقالت بخجل  
"صباح النور"

"انا قررت انى مش هسيبك بالليل لوحدك تانى وهشتغل  
شيقت الصبح... ايه رأيك"  
بكل سعادة ردت  
"اه كويس جدا"

"انا عرفت انك كنتى قاعدة معايا طول مانا فى المستشفى...  
انا بشكرك جدا على تعبك معايا... وعمايز اقولك حاجة "  
كان ياسر هيقولها انه بيحبها ومحيش حد غيرها فى اللحظة  
اللى حست بيها شيرين بدبلة ياسر لمست صوابها وايدها فى  
ايده... افتكرت خطيبته... وعرفت ان اى كلام هيقوله من تأثير  
احساسه بمساعدتها له فى مرضه فخافت انه يكمل بكلام غير  
حقيقى فقاطعته

"انا معملتش حاجة... ده واجب عليا لانك انقذتنى"  
"يعنى ساعدتيني علشان كده بس"  
كان مستنيها تديله فرصة يعبر عن حبه ليها بس كملت  
"لا مش علشان كده بس... علشان كنت خايفة انام فى البيت

لوحدى"

ساب ياسر ايدها وقام بسرعة بعد ما حس بخيبة امل وهو  
خارج من الاوضة التفت لها  
"شكرا على حسن تصرفك وانك مخضيتيش امي انا شفت  
الرسايل على تليفونى وفهمت اللى حصل.. متشكر جدا"  
خرج من الاوضة وقلل الباب وراه بعد ما قفل... قعدت شيرين  
تعيط وتقول بصوت واطى  
"بحبك والله العظيم بحبك بس مينفعش احبك وواحدة تانية  
فى حياتك... مستحملش حد يشاركنى فى احساسى بيك"

بعد ما ياسر حس بصد شيرين ليه كان بيحاول انه يحب منال  
وينسى شيرين فكان بيكلمها كل يوم بالساعات وطبعاً لانهم كانوا  
بيروحوا الشغل مع بعض ويبجوا مع بعض فكانت شيرين ملاحظة  
بعد ياسر عنها وميله ناحية منال وكانت هتموت من الغيرة بس مش  
قادرة تعمل حاجة... لحد يوم وهى فى الشغل سمعت ان فيه قرار  
صدر من الفرع الرئيسى لكل الفروع فى الدول المختلفة... ومضمون  
القرار... ان اقصى مدة لاي عقد من دولة لآخرى سنتين غير قابلة  
للتجديد... لما شيرين عرفت بالقرار ده اتضايقت جداً... معنى كده  
ان فاضل شهور وينتهى اتفاقها مع ياسر ويخرج من حياتها للأبد  
اما ياسر ففى الفترة اللي قرب فيها من منال حس بصعوبة  
حياتها مع مرات ابوها والمشاكل اللي بتفتعلها مع كل حركة وكلمة  
وكان اغلب كلام منال لياسر "انت جيت لى بعد ما كنت قريت اياس  
من حياتى كلها... انت الوحيد اللي هتخرجنى من اللي انا فيه...  
بستنى اللحظة اللي اسيب فيها بيت بابا وتنجوز"





”ماشى... هتنزلى امتى“

”ادخل ألبس و ننزّل“

نزّلوا مع بعض وكانت شيرين مستنية يمسك ايديها زى زمان  
ولكن خاب املها لما لقيت ياسر ماشى جنبها عادى وفعلا راحوا  
اشترى حاجات للبيت وكان ياسر بيّفك فى التعامل واحدة واحدة...  
هى عارفة ان قلبه ابيض ومش بيقسى عليها... مش بيقسى عليها  
ولا هو طبعه مش بيقسى على حد خالص... مش مهم المهم انهم  
يتعاملوا مع بعض كثير وعن قرب... وهما ماشيين جنب محل  
ملابس

”شيرين تعالى بصى كده“

”اه.. حلو اللبس اللى هنا عايز تشتري حاجة لاختك ولا

لخطيبتك“

”تعالى ندخل وانا اقولك“

كانت متضايقه لانها حست انه هيشترى لخطيبته... يشترى

هو حر... بس مش هى اللى تنقى الهدوم اللى هتلبسها له

”شيرين ايه رأيك فى الطقم ده“

”شيك اوى مبروك عليها“

”الله يبارك فيكى بس لما تدخل تقيسه الاول... يالا ادخلى

ماشوفه عليكى ليكون كده ولا كده“

”مين دى انا؟“

فرحت شيرين اوى انه بيحبيب لها حاجة ايا كانت الحاجة  
دى بس انه فكر يجيبها حاجة دى كانت كبيرة اوى بالنسبة  
لها... دخلت تقيس الطقم وكانت فرحانة اوى وياسر كمان ابتسم  
لها وقالها

”حلو اوى عليكى“

رجعوا البيت وهى فى منتهى السعادة وبتحاول تتناسى اى  
حاجة ممكن تضايقها... ورجعوا يقربوا من بعض تانى وكل وقتهم  
مع بعض بيخرجوا مع بعض ويقعدوا يتفرجوا على التليفزيون مع  
بعض ويروحوا الشغل مع بعض ويبجوا مع بعض  
كان ياسر مستمتع جدا بالوقت اللى بيقضيه مع شيرين...  
وكذلك شيرين بس كان اللى مضايقه احساسه بالتمزق بين شيرين  
ومنال... هو متأكد انه بيحب شيرين بس حب من طرف واحد  
وكان محتار فى تفسيره للمعاملة الطيبة اللى بتعاملها شيرين  
وخاف لو لمح لها تانى تصده ويرجعوا يبعدوا عن بعض تانى...  
وكانت منال بتتعلق بيه اكثر واكثر وكانوا فى مصر ماشيين فى  
التجهيزات للجواز علشان اول مايرجع يكون البيت جاهز

فاتت شهور وكانت الاجازة قريت يعنى لسه تقريبا شهر  
ونص ويرجعوا .... وفى يوم وهما نازلين الشغل ملقاش شيرين

جاهزة زى ما هو متعود فراح لها

”شيرين انتى لسه نايمة“

كانت شيرين فى سريرها فعلا

”مش قادرة اقوم“

”مالك“

وقرب ياسر منها ولمس وشها بحنية

”ايه ده انتى سخنة اوى“

ولما لقي ياسر ان الوقت بدرى على مواعيد العيادات

”شيرين تقدرى تقومى معايا اوديكى مستشفى... اكيد مفيش

دكاترة دلوقتى“

شاورت له شيرين بالموافقة ورفعت نفسها من على السرير

وياسر ببسندها ويدوب حطت رجلها على الارض ووقفت لقيت

نفسها بتدوخ وبتقع على الارض لولا ان ياسر كان ماسكها كويس

فوقعت فى حضنه بدل الارض ... اتخض عليها ياسر اكثر واكثر

ونيمها تانى فى السرير ... كانت مش قادرة تتكلم .... بقى ياسر

مش عارف يتصرف... فكر ان ربما حد من زميله المغاربة يكون



”شيرين“

كانت شيرين راجعة من الحمام

”ايوه يياسر مالك“

”انتى فين “

”كنت فى الحمام“

” خضيتينى عليكى يا حبيبتى “

لمعت عين شيرين من الفرحة والدهشة وبصت لياسر

”حبيبتك“

”ايوه حبيبتى وروحي وحياتى كلها انتى يا شيرين“

قرب منها ياسر وقربها منه وخذها فى حضنه

رمت شيرين نفسها بين ذراعه واستسلمت لاحساسها ودفنت

راسها فى صدره وهى بتقوله بصوت رقيق

”وانت حبيبى“

بكل هدوء رفع ياسر راس شيرين وبص لها

”حبيبتي لازم ترتاح“

واخذها ونيمها على السرير وهي مستسلمة تماما من ناحية  
انها فرحانة انها اتأكدت ان ياسر بيحبها ومن ناحية ثانية انها  
فعلا تعبانة ومش قادرة تقف... بعد ما نامت وغطاها

”انا اسف انى نمت هنا غضب عنى“

”مممكن اطلب منك طلب“

”أؤمري“

”ادخل نام وارتاح وانا بقيت احسن وهكمل نوم... انت تعبت

معايا ولازم ترتاح شوية “

وافقها ياسر وباس راسها قبل مايدخل ينام... اليوم ده كان  
شيرين بدأت تتحسن وقدرت تقوم من السرير وتتحرك فى البيت  
وهما قاعدين مع بعض بيتفرجوا على التلفزيون ... كانوا قاعدين  
جنب بعض وياسر حاطط ايده على كتفها وهي ساندده راسها على  
كتفه ومندمجين مع الفيلم ... لما رن موبايل ياسر

”ازيك يا بابا...انا كويس الحمدلله“

كانت شیرین متوقّعة انها خطيبته ولما سمعته بيقول يابابا

ارتاحت

وقام ياسر يتكلم وهو واقف وكان هيدخل اوضته يتكلم ولكن

خاف لشيرين تتضايق فرجع يكمل كلامه وشيرين عينها عليه

”خير يابابا ايه اللي حصل... امتي... ازاي يعني طردتها...“

وانا اعمل ايه؟... هي فين دلوقتي... طيب... ازيك يامنال... معلى

متزعليش... متعيطيش بابا هيحل كل حاجة ان شاءالله... هكلمك

تاني... سلام“

اول ماشيرين سمعت اسم منال قامت تدخل اوضتها... بس

ياسر مسك ايدها وهو بيتكلم ووقفها جنبه لحد ماخلص وقعدوا

يتكلموا

”ايه ياشيرين قمتي ليه“

”علشان تكلم خطيبتك براحتك... انا مليش مكان وسطكوا“

”بس انتي حبيبتي ومراتي“

”انا حبيبتك ومراتك... وهي هتسيبها؟“

”مقدرش اسيبها“

قامت شيرين على اوضتها ومقدرتش تمسك دموعها ودخل

وراها ياسر ومسح لها دموعها وطبطب عليها وضمها ل صدره

”ولا اقدر اسيبك... يا شيرين انا بحبك“



”ومشكلتى انى بحبك وعمايزاك ليا لوحدى من غير ما حد

يشاركنى فيك... انما انت بتحبها ومش عايز تسيبها“

”مش حب انتى عارفة بابا بيكلمنى يقوللى ايه؟؟ منال عايشة

مع مرات ابوها فى عذاب من وهى عندها ٥ سنين امبارح طردتها

نص الليل بعد خناقة اتفرج عليها الشارع كله... لما اتطردت طبعا

ماما خدتها عندها وبابا بيقول انه هيروح لباباها ويحدد معاه معاد

الجواز بعد ما رجع... وهى منهارة ومستنية ارجع لانها شايفانى

اللى هخلصها من اللى هى فيه...تفتكرى اقدر اروح اقولها بكل

سهولة خلاص معلىش انا مش قد كلمتى.. واظلمها؟“

”لا اظلمنى انا؟“

”بس هيا مالهاش ذنب“

”انما انا ذنبى انى بحبك“

”يعنى هو لازم حد يتظلم“

”يعنى ايه؟“

”يعنى انتى حبيبتى ومراتى ونكمل حياتنا مع بعض عادى...“

وهى اكمل برضه معاها علشان مش هقدر اقولها واقول لاهلى كده

خلاص وانا مش هكمل“

”وده اللى مستحيل اقبله لو هموت من غيرك ولا انى ابقى

زوجة وحبيبة فى الضل وكأنى مذنبه“

”يعنى ايه“

”يعنى القرار قرارك... يا أنا يا هي“

”ليه ياشيرين بتعجزيني“

”انا بخيرك وانت تختار... ولو سمحت قوم واقفل الباب انا

عايزة انام علشان رايحة الشغل الصبح“

سمع ياسر كلامها وقام وقفل عليها اوضتها وهو مش عارف

يتصرف ازاي... بيحب شيرين وهي بتحبه... طيب يغدر بمنال

اللى شايفاه طوق نجاة بالنسبة لها... مش ممكن... بعد تفكير اتصل

بباباه

”الو... بابا استنى متروحش لابو منال وتحدد معاه معاد“

”انا لسه نازل من عنده وحددنا مش انت جاي الشهر الجاي

بعد ماتوصل بشهر بالضبط تكونوا فى بيتكوا... مبروك يا بنى ربنا

يتمملك بخير“

مقدرش ياسر يرد بكلمة وزادت حيرته... هو علشان يحافظ

على حبه لازم يظلم واحدة بريئة ولو ماظلمهاش لازم يخسر حبيبته

كان ياسر مش قادر ياخذ قرار وكان امله ان شيرين تحن

وترجع عن قرارها وكان كثير بيحاول يتقرب لها وكانت دايمًا

بتسأله عن اختياره وقراره الاخير... وكان مش قادر يختار

وقرب معاد الرجوع وقبل السفر بأسبوعين كانت الشركة عاملة  
حفلة كبيرة لتكريم العاملين اللي بتنتهى عقودهم من مختلف  
الجنسيات... وكان طبعا ياسر وشيرين من المدعويين وخصوصا ان  
شيرين وضعها مختلف لمنصبها الكبير فى الشركة...كانت الصحافة  
والتليفزيون مدعويين للحفلة

وللاسباب دى كانت شيرين بتستعد بما يتناسب مع  
الحفلة... نزلت قبل الحفلة بكام يوم واشترت فستان سواريه من  
اشيك المحلات وجابت بدلة لياسر متناسقة مع الفستان...  
وحجزت كوافيرة تيجى لها فى البيت

يوم الحفلة لبس ياسر واستعد وقعد يستنى شيرين... وبعد  
ماخرجت الكوافيرة من البيت... خرجت شيرين من اوضتها...  
وقف ياسر مندهش... لاول مرة ببشوف شيرين بالجمال ده حتى  
يوم كتب الكتاب مكنتش بالجمال ده... كانت فعلا مبهرة قرب  
منها وانحنى واخذ ايدها وباسها

”مولاتى ملكة جمال الكون جاهزة“

ابتسمت شيرين بخجل وفرحة

”جاهزة يا ملك قلبى“

ضحكوا مع بعض وخرجوا وقابلوا جلال وجيهان نازلين...

اول ما جيهان شافتها



تانى يوم كان ياسر وشيرين جواهم احاسيس مختلفة ومش  
قادرين يواجهوا بعض بيها

ياسر... كان سعيد لانه لاول مرة من سنتين يقضى ليلته مع  
مراته وحبيبته... بس كان حاسس انه اتسرع لانها اخر كلامها معاه  
انه يختارها او يختار منال... وكان خايف انها تعتبر اللي حصل  
بينهم اختيار غير معلن لها بانه اختارها وهيسيب منال وده اللي  
ميقدرش عليه... هو فعلا بيحب شيرين بس ميقدرش يبدأ حبه  
وحياته معاه على غدر وظلم لمنال اللي مفرحتش غير لما ظهر فى  
حياتها... وكان كل ماييجى يتكلم مع شيرين... ميلاقيش كلام  
فيسكت.



شيرين... لاول مرة تحس بالسعادة اللي كانت بتسمع عنها  
وهى بين ايدين ياسر... بس ياترى هو كان قاصد يحصل كده كنوع  
من الضغط عليها والرضا بالامر الواقع؟؟ معقول يكون كان متعمد؟؟

اتضايقت لما حسست انها ممكن تكون مجبرة على اختيار هي  
رافضاه... وكانت كل ماتيجى تتكلم...متلاقيش كلام فتسكت.

كان السكوت اللى بينهم مش طبيعى وخصوصا ان السفر قرب  
ولازم يبقوا على نور وكل واحد يعرف هيتصرف ازاى... فقرر ياسر  
انه يبدأ بالكلام

”شيرين انا آسف“

”بتتأسف على ايه؟“

”انا عارف ان اللى حصل كان غلط والمفروض ميحصلش“

حسست شيرين باهانة وهو بيقول كلمة غلط

”احنا معملناش حاجة غلط“

”يعنى هنكمل حياتنا مع بعض“

”حسب اختيارك“

”مانا قلت لك مقدرش اغدر بمنال دول جهزوا كل حاجة

وحددوا يوم ٢٠ الشهر الجاى“

”يعنى بعد مانرجع بشهر بالطبط..مبروك يا عريس“

”ياشيرين انا بحبك انتى“

”اااا طبعاً بتحبنى... وعلشان كده اخترت تتجوز واحدة

تانية“

”بصى خلينا نكمل مع بعض وخصوصا اننا فعلا بقينا  
متجوزين بجد“

واتغيرت شيرين وبصت له نظرة حادة جدااا  
”انسى يا ياسر انك تكون فاكرنى هتخط قدام الامر الواقع  
وارضى بحاجة انا مش عايزاها... اتفارقنا زى ماهو...والطلاق مع  
السفر“

كان قرار نهائى وكانوا بيتعاملوا مع بعض الايام اللى متبقية  
قبل السفر بحذر علشان محدش فيهم يزعل التانى... ويوم السفر  
بعد تحضير الشنط وخلص شوية وهينزلوا  
”ياشيرين ارجوكى فكرى تانى“  
”خلص ياياسر وقت التفكير خلص خلاص ومش فاضل غير  
التنفيذ“

”بس انا مش هقدر اطلقك وانا بحبك“  
”لو بتحبنى طلقنى من غير مشاكل“  
ولاول مرة تشوف شيرين دموع ياسر وهى متأكدة انها من  
قلبه.. ونزلت دموعها وهى بتططب عليه واختلطت الدموع وهما  
بيضموا بعض بقوة...لدقايق وبعدين كان لازم ينزلوا علشان وقت  
الطيارة







”لو سمحت يا ياسر... احنا موضوعنا خلاص انتهى ومنتصلش  
بيبه تانى مع السلامة”

وقفلت بسرعة قبل ما يرد عليها وحست ان الدنيا بتلف بيها  
لما عرفت ان كلها ايام ويتجوز وانه خرج من حياتها للأبد... فاقت  
بعد شوية عرفت من زمايلها انها بعد المكالمه اغمى عليها روح  
وهي فاقده الاقبال على الحياه... بعد ما وصلت للبيت كانت مامتها  
فى البيت ومروه لسه فى الشغل... وبعد ما طمنت مامتها انها  
كويسه

”فيه موضوع يا شيرين عايزه اكلمك فيه”

”خير يا ماما”

”من قبل ما ترجعى وفيه عريس عايز بيحى يتقدم لاختك وكنا  
مستنيين رجوعك... وبعدين مقدرناش نقولك لما عرفنا بحكاية  
الطلاق بس احنا عمالين نأجل والجدع كويس واختك مش عايزه  
تقولك لانها شايفاكى زعلانه ومتضايقه”

”ياه ياماما... بتؤجلوا ليه... خليه يحدد معاد ويبجى وربنا

يتمم لها بخير”

جه العريس وحددوا معاه معاد للخطوبه والشبكة... بعد  
اسبوعين ويوم الخطوبه كانت شيرين طول اليوم مع اختها وعملوا  
الخطوبه وكانت بتحاول تبان سعيدة علشان محدش يحس بالحزن

اللى جواها ومن كتر ماهى كانت مشغولة طول اليوم نسيت تاكل اى  
حاجة وبالليل وقبل الخطوبة ماتخلص وهى واقفة تتصور مع اختها  
حست بدوار وفجأة فقدت الوعى

الحفلة اتقلبت وطلبوا الاسعاف وفى المستشفى... طمنهم

الدكتور وقالهم ان الدوخة امر طبيعى لانها حامل

لما عرفت انها حامل فرحت ومسكت بطنها وقال لنفسها

"الحمد لله ان ربنا عوضنى عن ياسر بابنه"

وقبل ماتخرج من المستشفى قالت لها مامتها

"مبروك يا شيرين انتى لازم تقولى لجوزك انك حامل يمكن

ربنا يصلح الاحوال وترجعوا لبعض"

عيطت شيرين من كلام مامتها وردت عليها

"مستحيل يعرف"

وكملت بينها وبين نفسها...لانه هيتجوز واحدة تانية كمان

ايام

ياسر كان بيستعد للجواز بعد ايام... وحت ياسمين تقيم  
معاهم فى البيت لان جوزها جاله شغل وهيسافر... فكانت شيرين  
الصغيرة متعلقة بياسر وياسر متعلق بيها اوى... وكان بيحبها حب  
غير عادى لانه حاسس على الاقل ان اسم شيرين مش هيتلغى من  
حياته

كان ميعاد استلام العفش قبل الفرح بـ ٤ ايام وده كان مسبب  
توتر للاسرة كلها ففكروا فى تأجيل الفرح لما الموبيليا تخلص وفعلا  
اجلوه اسبوعين كمان

فى اليوم اللى اجلوا فيه معاد الجواز قالت منال انها مستننية  
الايام تعدى بسرعة علشان تبعد عن بيت باباها... بس تانى يوم  
كلمته منال وقالت له عايزاه فى موضوع مهم بره وبعيد عن الاسرتين  
لما خرجوا مع بعض كان مش عارف منال مترددة وهى بتتكلم  
"مالك يامنال عايزة تقولى ايه"

"ياسر انا مش عارفة ابدأ معاك منين"

"ابدأى من اى حته بس قوليلى فى ايه؟"

"انا عايزة نأجل الجواز شوية... يعنى كتير"

”مش فاهم شوية.. كثير.. انتى عايزة ايه اتكلمى معايا بصراحة  
ووضوح انا مش فاهم“

”انا هقولك الحكاية ... انا بقالى كام سنة بكلم امى وامى  
بتكلمنى من ورا بابا ومراته... وعلى فترات متباعدة... انت عارف  
ان من يوم ما تطلقوا وماما اتجوزت وبابا منع اى علاقة بينى  
وبينها...كلمتنى امبارح وقالت لى ان جوزها مات من اسبوع  
وعايزانى اعيش معاها سواء بابا قبل او رفض...انا نفسى فعلا  
اعيش معاها ... نفسى اشوفها واقعد اتكلم معاها... نفسى تاخذنى  
فى حضنها... نفسى اشبع من امى اللى اتحرمت عمرى كله منها“  
كان كلام منال مختلط بدموعها واثرت كثير فى ياسر طبطب  
على ايدها

”روحى يامنال واقعدى مع مامتك ومتسيبيهاش ابدا“

”انت زعلت منى“

”لالا خالص والله انا عايزك تعوضى حرمانك من مامتك  
ومتسألش فى كلام حد ولا تعملى حساب لحد... انتى عشتى  
عمرك كله فى عذاب ومكنش حد حاسس بيكى... روحى وربنا  
يسعدك“

”يعنى بجد مش زعلان منى انى فجأة كده بتراجع“

”لا طبعاً انا يهمنى راحتك وراحة مامتك اللي اكيد كانت  
بتتعذب وانتي بعيد عنها“

كان ياسر فى منتهى السعادة ان موضوع منال انتهى  
خالص... والعجيب ان هى اللي نهت الموضوع بنفسها ...  
الحمدلله... كان عايز يطير لحد شيرين ويقولها انه بقى لها  
لوحدها... بس فكر هيروح ازاى... هيرجع لها ويعيشوا فى الشقة  
البسيطة اللي كان هيتجوز فيها منال... وهيرجع يشتغل ميكانيكى  
تانى ... رجعت الفروق اللي بينهم تانى ومينفعش ينساها ولا هى  
هتنساها... النتيجة ان مينفعش يرجعوا لبعض.

\* \* \*

مقدرش ياسر يقنع نفسه انه ينسى شيرين... لكن فكر ازاى  
يقرب المسافات اللي بينهم... راح باع الشقة واسترد فلوس العفش  
لان دى كل الفلوس اللي عملها من السفر... وراح اجر ورشة كبيرة  
واشترى عربيات مستعملة بس حالتها سيئة ورخيصة... واستغل انه  
ميكانيكى شاطر وقعد شهر يصلح فى العربيات ويدهنها ويظبط  
حالتها وقرر انه يفتح الورشة اللي اجرها معرض سيارات مستعملة

\* \* \* \* \*

كانت شيرين تعبانة من اعراض الحمل وبدأ الشغل يبقى عباً  
عليها فكانت بتاخذ اجازات كتير وهى مش متعودة على كده وبعد



كان ياسر ببيص لليافطة وهو سعيد ويقول يمكن يكون المعرض  
سبب فى نجاحه ... اتمنى ان شيرين تشاركه اللحظة... لحظة  
افتتاح المعرض... وقبل الافتتاح بساعتين قرر انه يروح لشيرين  
ويطلب منها انها تحضر معاه الافتتاح ويقولها انه مش بيحب حد  
غيرها

راح ياسر بالعربية عند بيت شيرين وهو بيركن شاف اللي  
مكنش ممكن يتوقعه

\* \* \* \* \*

كانت شيرين قاعدة مع مامتها ومروة وخطيبها لما فجأة حست  
بأعراض الولادة ... مغص شديد ومش قادرة تتحملة... واعراض  
تانية اول ماقاتها للدكتور فى التليفون قالها لازم تكون عنده فى  
المستشفى فى اسرع وقت... كانت مش قادرة تقف على رجليها من  
الالام اللى فيها... كان خطيب اختها بيسندها من جنب واختها من  
الجنب التانى ... ومامتها بتلم هدموم البيبي فى شنطة ونازلة  
وراها... وقبل ما يخرجوا من العمارة... شيرين قالت لمروة  
"الحقى ماما قبل ماتقفل وخليها تجيب الشنطة الصغيرة اللى  
فى الدولاب مع شنطة هدموم البيبي لاحسن نسييت اقولها تجيبها  
معها"



طلعت مروة لمامتها وكانت شيرين سائدة على خطيب اختها  
وهما خرجين من العمارة وهيركبوا عربيتها لانها الاقرب  
شاف ياسر شيرين وهى مع واحد وحامل...كانت صدمة  
بالنسبة له لما عرف ان شيرين اتجوزت بالسرعة دى وكمان حامل  
من جوزها الجديد

\* \* \* \* \*

عدت سنة ووراها السنة اللى بعدها وكل واحد فيهم بدأ يأقلم  
حياته على عدم وجود حبيبته  
ياسر بقى تاجر سيارات معروف وفتح معرض واتنين لما بقى  
يكسب كويس من تجارة العربيات... مقدرش يتجوز حد تانى وكان  
عايش على ذكريات ايامه مع شيرين فى المغرب... وكانت شيرين  
الصغيرة بالنسبة له خط فاصل كل طلباتها هو اللى يجيبها...  
محدث يقدر يزعلها ولا حتى مامتها وباباها وكان كل ماينادى  
عليها

"شيرين حبيبتي"

\* \* \* \* \*

اما شيرين فبعد ماولدت "زياد"كانت كل حياتها له هو بس  
ورفضت فكرة الجواز نهائيا منها سبب علشان زياد والسبب التانى

حبها لياسر وكان كل وقتها فى البيت مع مامتها وزياى بعد مروءة ما  
اتجوزت .

وقبل عيد ميلاد زياى الثانى بيوم لقيت شيرين زياى سخن  
وكعادتها قلقت عليه وبسرعة خدته وراحت للدكتور ... كانت رقم  
٨ فى الكشف وقعدت تستنى... كان الانتظار ممل وكان الكشف رقم  
٧ عند الدكتور لما شافت ياسر داخل العيادة ومعاه بنت صغيرة فى  
ايده .. المفاجأة كانت كبيرة عليها ... اضطربت وتوترت وارتعشت  
لما عينها جت فى عين ياسر

اول ما ياسر شافها اختلطت جواه مشاعر الفرحة والدهشة  
والحب

ومد ايده يسلم عليها

"ازيك يا شيرين"

ومدت شيرين ايدها اللى بترتجف وسلمت على ياسر

"الحمد لله ... ازيك انت يا ياسر"

"اهو عايش الحمد لله... ابنك ده"

وبدموع تحاول تحبسها

"اه زياى ابنى"

"ربنا يخليهولك... انا جاى مع شيرين بنت اختى"

"شيرين؟؟؟"

“اه شيرين... اتولدت لما كنا فى اجازة هنا ايام المغرب”

“سلامتها.. ربنا يشفيها ان شاءالله”

“وربنا يشفيك زياد ويخليهولك انتى وباباه”

قبل شيرين ماترد كان الكشف اللى عند الدكتور بيخرج

والمرضة بتنادى

“زياد ياسر عبد الفتاح... يالا دورك يامدام”

لحظة بين سماع ياسر للاسم وبين نظرتة لشيرين وهى دموعها

نازلة ونظرتة لزياد

وهو بيسأل شيرين

“ابنى؟؟؟”

مقدرتش شيرين ترد غير بهزة راسها ودموعها

ياسر اخد زياد فى حضنه وهو بيسألها

“انتى متجوزتيش”

“متجوزتش غيرك... انما انت بسرعة اتجوزت ونسيتنى”

“انا محبتش ولا اتجوزت غيرك... انتى بس حبيبتى”

\* \* \* \* \*

## مشهد النهاية

شقة كبيرة فاخرة... ياسر قاعد بيلعب مع زياد... شيرين  
بتنادى عليهم للغدا... وفجأة تصرخ... اصل معاد الولادة الثانية  
دلوقتي.

تمت بحمد الله